

An Exposition of the  
**Seven Church Ages**

Chapter Four

**Eleko Ya Lingomba Ya Sumuluna**

Emoniseli 2:8-11

*"Komela angelu ya Lingomba ya Sumuluna ete : Ye oyo azali Moto ya Yambo mpe ya Nsuka, Ye oyo akufaki mpe azongi na bomoi Alobi boye :*

*Nayebi misala mpe minyoko, mpe bobola na yo, (nzokande ozali mozwi) mpe nayebi kofinga ya baoyo balobaka ete bazali Bayuda, kasi bazali yango te, bazali nde eyanganelo ya Satana.*

*Kobanga te makambo oyo ekoyela yo. Talá, Zabolo akobwaka basusu kati na bino na boloko mpo na komeka bino, mpe bokonyokwama mikolo zomi. Zalá sembo ata kino na liwa, mpe Nakopesa yo motole ya bomoi.*

*Ye oyo azali na litoi, áyoka oyo Molimo alobi na mangomba; moto oyo akolonga, akoyokisama mpasi ya liwa ya mibale te."*

**MALOPA YA EBANDELI**

Mpo na kozongisa makanisi na bino, nalingi lisusu kotalisa ndenge oyo tokómaka na koyeba bankombo ya bamemi-nsango ya bileko ndenge na ndenge. Nzambe, kati na bonsomi ya mokano na Ye, asalaki ete lisoló ya lingomba ya Kondimana ya Sika ebunga te, bobele lokola asalaki ete lisoló ya Yisalaele ebunga te na kotyáká yango kati na Biblia mpe na komonisáká yango lelo oyo na ebele ya barulo, bambeki ya mabelé mpe biloko mosusu oyo bato ya arkeoloji bakundoli mpe balimboli. Kutu, tozali na maloba ya lisolo ya Biblia kobanda na lokasa ya liboso ya Buku kino lelo oyo.

Na boye na kotángáká mambi ma kala, tokoki koyeba moto to bato nini oyo kati na bileko ndenge na ndenge, bazalaki mpenza penepene na motindo ya ebandeli ya Nzambe, Ntoma Polo Bato oyo Nzambe asalelaki mpo na kozongisa bato na Ye na Liloba ya Solo bakozala bayo tokotalela. Na nsima, kati na bato yango, ekozala na moto moko mpo na eleko mokomoko oyo akobima polele lokola oyo azali mpenza penepene na ndakisa mpe na nguyu ya Liloba. Moto wana nde akozala momemi-nsango. Tokoki mpe koyeba bileko yango soki toyekoli masolo ya kala. Esengeli bobele kotángá bileko ndenge ekomami kati na Emoniseli mpe okomona ete nyonso ekokani mpenza na mambi ma kala lokola ESENGELI MPENZA. Lokola bileko ya lingomba esakolamaki na Nzambe mpe bizalela na yango kutu emonisami, na bongo esengelaki mpenza ete lisolo oyo elingaki kolanda ekokana na oyo Biblia emonisi. Ezali na yango pete — kasi komikitisa wana nde ezali fungola mpo na Liloba. Kasi ná makambo nyonso oyo nazalaki kaka te moyekoli mpe moto ya mayele ya mambi ma kala, nalukaki kozala moto oyo atyaka makanisi na makambo ya Molimo, mpe ezalaki bobele na bondimi ya sikisiki ya Molimo na Nzambe nde naponaki bato oyo naponi. Oyo ezali ya solo, ndenge Nzambe ayebi motema na ngai.

**MOMEMI-NSANGO**

Na kosaleláká mobeko oyo Nzambe apesi biso ya kopona momemi-nsango mpo na eleko moko na moko, tozali koloba kozanga kokakatana ete Nkolo atombolaki Irénée na esika yango. Ye azalaki moyekoli ya mosantu wana monene mpe mobundi ya kondima, Polycarpe. Mpe na ntembe te, wana afandaki na makolo ya moto wana monene, ayekolaki ngolu ya boklisto oyo eutaki na bomoi na ye ya komipesa, mpamba te Polycarpe azalaki moko ya basantu ya lokumu mpenza ya bileko nyonso, na oyo etali kozala na bomoi oyo ezangi mbeba

Soki otángi yango, okomona ete Polycarpe akufaki lokola martiru. Lokola azalaki mobange mingi mpo na kokima, mpe na bosembo mingi mpo na kotika moto mosusu abómbe ye mpe na nsima azwa etumbu mpo na kosala bongo, amipesaki mpo na kobomama. Kasi liboso ya kosala yango, asengaki mpe bapesaki ye ndingisa ya kobondela ngonga mibale mpo na bandeko na ye kati na Nkolo, mpo na mokambi ya mboka, mpo na banguna na ye mpe baoyo bakangaki ye. Lokola basantu minene ya bileko nyonso, na mposa ya lisekwa ya malamuru koleka, atélélaki ngwi, aboyaki kowangana Nkolo, mpe akufaki na lisosoli ya peto. Atiamaki likolo na nzete ( ndenge asengaki, bakangaki ye na nsinga te) mpe bapelisaki móto. Móto elongwaki na nzoto na ye, eboyaki kosimba ye. Na bongo, batobolaki ye na mopanga. Ntango basalaki yango, mai ebimaki longwa na mopanzi na ye mpe ebomaki móto. Molimo na ye emonanaki mpenza kobima lokola ebenga ya mpembe uta na ntolo na ye. Nzokande, atako litatoli wana ya nkembo, moyekoli wana ya ntoma Yoane abundisaki ebongiseli ya ba Nikolaiti te, mpo ye moko atyaki motema na ebongiseli, kozangáká koyeba ete mposa ya kozala na boyokani na baninga, mpe eloko oyo emonanaki lokola mwango malamuru mpo na kokolisa mosala ya Nzambe, ezalaki mpenza motambo ya monguna.

Nzokande, ezalaki bongo te mpo na Irénée. Ye azalaki kobundisa lolenge nyonso ya ebongiseli. Lisusu, lisoló ya bomoi na ye, wana azalaki kosalela Nkolo, etondisamaki na bimoniseli mingi ya Molimo Mosantu; mpe Liloba eteyamaki na bosikisiki mpe na boyokani na malako na yango ya ebandeli. Mangomba na ye na France eyebanaki ete ezalaki na makabo ya Molimo kati na yango, mpamba te basantu bazalaki koloba na minoko mosusu, kosakola, kosekwisa bakufi, mpe kobikisa babeli na nzela ya libondeli ya kondima. Amonaki likámá ya lolenge nyonso ya bondeko oyo ebongisami, kati na bankulutu, bakengeli, mpe bongo na bongo. Atelemaki makasi mpo na losambo ya esika moko oyo ezali na bomoko, etondisami na Molimo, mpe ezali na komonisama ya makabo. Mpe Nzambe apesaki ye lokumu mpo nguya ya Nzambe emonisamaki kati na basantu.

Atalisaki mpe polele bososoli na ye ya Bonzambe. Mpe lokola azalaki moyekoli ya Polycarpe, oyo na ngala na ye azalaki moyekoli ya Yoane Mosantu, tokoki koyeba na kozanga ntembe ete azalaki na mateya ya malamumu mpenza na ntina na likambo yango. Buku "Ante Nicene Fathers" na eteni na yango ya liboso, lokasa 412; etalisi biso malota na ye oyo likolo na Bonzambe: "Ndenge moko mpe, maloba mosusu nyonso ezali komonisa ebyángeli ya moto mpe ekelamo moko, Nkolo ya Nguya, Nkolo, Tata ya Nyonso, Nzambe Mozwi-na-Nguya-Nyonso, Oyo-Aleki-Likoló, Mozalisi, Mokeli, mpe bongo na bongo, yango ezali te bankombo mpe bibiangeli ya bikelamo ndenge na ndenge oyo bazali kolandana, kasi ya moto bobele moko". Alobaki polele ete wana ezali bobele bibyángeli lokola Rosa ya Salona, Monzoto Mokongengaka na Ntongo, Oyo Aleki Kitoko kati na Nkóto Zomi, mpe bongo na bongo. Nzambe mpe azali bobele MOKO. Nkombo na ye ezali Nkolo Yesu Klisto.

Na boye, na ndenge ye akangamaki mpenza na Liloba, na ndenge azalaki na bososoli malamumu ya Makomi, mpe na ndenge oyo nguya ya Nzambe ezalaki kosunga ye na mosala yango, azalaki moto oyo abongi mpenza mpo na eleko oyo. Ezali mpenza mawa ete bileko mosusu bizalaki te, kati na bameminsango na bango, na bokatikati ya boye ya mbuma, nguya, mpe bokonzi kati na Molimo Mosantu mpe Liloba.

## SUMULUNA

Engumba ya Sumuluna ezalaki mwa moko likolo ya Efeso, pembeni ya monoko ya etíma ya Sumuluna. Na ntina na libongo na yango ya kitoko, ezalaki esika monene ya mombongo oyo eyebanaki mingi mpo na biloko oyo ezalaki kotékama na mikili mosusu. Yango eyebanaki mpe mpo na biteyelo na yango ya koloba malamumu, ya filozofi, ya monganga, ya siansi, mpe na bandako na yango ya kitoko. Bayuda mingi bazalaki kofanda kuna, mpe bazalaki kotémela Bokristo na makasi nyonso, koleka kutu Baloma. Na bosolo, Polycarpe, episkopo ya liboso na Sumuluna, abomamaki lokola martiru na Bayuda, mpe elobami ete Bayuda babebisaki mokolo mosantu na bango (mokolo mwa mpóso) mpo na komema nkoni na esika ya kotumba ye.

Liloba oyo Sumuluna elingi koloba: "bololo," euti na liloba oyo, mola. Bazalaki kosalela mola mpo na kotya ebembe nkisi mpo epola te. Na yango, Nkombo ya eleko oyo ezali na ndimbola mibale. Ezalaki eleko moko ya bololo, etondi na liwa. Miwiti mibale oyo ezalaki kati na lingomba ebandaki kokabwana mingi moko na mosusu, mpe bololo ya mowiti ya lokuta emataki mingi koleka epai ya mowiti ya solo. Liwa ezalaki bobele momboto ya mowiti ya lokuta te, kasi ata mpo na mowiti ya solo, bokono ya bukabuka mpe kozanga nguya ebandaki kokota mpamba te basilaki kopéngwa longwa na bosolo ya péto ya mwa bambula ya liboso nsima na Pantekote; mpe mondimi moko te ya solo azali makasi mpe azali na bokolongono mpe bomoi ya molimo malamumu koleka boyebi mpe bokangami na ye na Liloba ya peto ya Nzambe, bandakisa mingi ezali kotalisa yango kati na Kondimana ya Kala. Ebongiseli ezalaki kokóla nokinoki, ezalaki kotalisa mpe kobakisa liwa ya bandimi na yango, mpamba te boyangeli ya Molimo Mosantu elongolamaki mpe bindimeli, mateya ya lokuta mpe milulu oyo esalemi na bato ezwaki esika ya Liloba.

Ntango Yisalaele ekótáki na boyokani ya mabe ná mokili, mpe esalaki boyokani na nzela ya libala, mokolo moko eyaki wapi mokili ezwaki bokonzi mpe Babilone ememaki libota ya Nzambe na boombo. Sikawa, ntango bakendaki na boombo, bazalaki na banganga-nzambe, tempelo mpe Liloba. Kasi ntango bazongaki bazalaki na balabi, ebongiseli moko ya teoloji ya Bafalisai, sinagoga, mpe Talmud. Mpe ntango Yesu ayaki, bango babebaki mingi mpenza na lolenge ete Ye ayebisaki bango ete bazalaki bana ya tata na bango, Zábolo, atako bazalaki bana ya Abalayama na mosuni. Na eleko oyo, tomoni likambo moko wanna kosalema. Nzokande, lokola 'Yisalaele mobimba' ezali Yisalaele te, kasi mwa etuluku moko ezalaki Bayisalaele ya solo ya Molimo, boye ekozala ntango nyonso na mwa etuluku moko ya bakristu ya solo, mwasi ya libala ya Klisto, kino Akoya mpo na baoyo ya Ye moko.

Kati na engumba yango, ezalaki na batempelo mibale oyo eyebanaki mingi. Moko ezalaki tempelo oyo etongamaki mpo na losambo ya Zeusi, mpe mosusu etongamaki mpo na Cybele. Mpe batempelo yango mibale ekangisamaki na nzela moko ya kitoko koleka ya ntango na kala, yango ebengamaki Balabala ya Wolo. Mpo na ngai yango ezali komonisa kokotisama mpenza ya losambo ya bapakano oyo esilaki kobanda na eleko ya liboso, kasi eyebanaki ete ezalaki bobele na Loma. Lisanga ya batempelo mibale ya nzambe mpe ya nzambe-mwasi ezali momboto ya losambo ya Malia, kati na yango Malia abéngami mama

ya Nzambe mpe azwi lokumu mpe bibengeli mpe nguya oyo ezali kokokanisa ye na Yesu Klisto.

Balabala ya wolo oyo esangisaki bango ezali elilingi ya lokoso oyo etindaki babongisi Banikolaiti básangisa lingomba mpe Leta, mpo bayebaki bomengo mpe nguya oyo yango ekokaki kopesa bango. Lokola Eleko ya Efeso ezalaki bobele mbeto ya momboto mpo na Eleko ya nsómo ya Pelegamo oyo elingaki koya na nsima, Eleko ya Sumuluna ezalaki mbula, moi, mpe bilei oyo ememaki libebi ya nsómo oyo ekozindisa lingomba kati na losambo ya bikeko oyo ezali ekobo ya molimo, lingomba ekolongwa na yango soko moke te. Liwa ekotelaki lingomba wuta na misisa kino na bitape, mpe baoyo basanganaki na lingomba basanganaki na bololo mpe na liwa. Eleko yango eumelaki kobanda na mobu 170 kino 312 ya ntango na biso.

### **MBOTE**

Emoniseli 2: 8,

*"Tala maloba na Ye oyo azali moto ya Liboso mpe moto ya Nsuka, Ye oyo akufaki mpe azali lisusu na bomoi".*

"Moto ya Liboso mpe ya Nsuka, Oyo akufaki mpe azali na bomoi." Sikawa Oyo ezali maloba ya moto te. Moto mpamba (soki akokaki koloba uta na nkunda) akoloba boye : "Ngai nazali moto ya liboso mpe ya nsuka oyo azalaki na bomoi mpe akufi." Likambo ya liboso oyo ekómelaka moto ezali ete abotamaka (azali na bomoi) mpe likambo ya nsuka oyo ekómelaka ye ezali ete akufaka. Na yango, ezali moto te nde azali koloba. Oyo ezali Bonzambe. Moto (Adama) azwaki bomoi mpe abongolaki yango na liwa. Kasi MOTO oyo (Yesu) azwaki liwa mpe abongolaki yango na bomoi. Adama azuaki bosembo mpe abongolaki yango na ekweli. Moto Oyo azwaki ekweli mpe abongolaki yango na boyengebene. Adama azwaki paladiso mpe abongolaki yango na esobe ya mpamba oyo ekauká; kasi Ye azali kozonga mpo na kobongola mabelé oyo ezali koningana mpe kotungisama na libebi na Edene mosusu. Adama azwaki bomoi ya bondeko mpe ya esengo elongo na Nzambe mpe abongolaki yango esobe ya molili ya molimo, oyo ebimisaki masumu nyonso, kobeba ya bizaleli malamumu, mpasi, minyoko, bokosi, mpe kobeba oyo ezali kobunda kati na milimo ya bato. Kasi Moto Oyo, uta na liwa nyonso ya mawa mpe kobeba oyo etondaki kati na bato, abimisaki bomoi ya boyengebene mpe ya kitoko. Mpo ete lokola bokonzi ya lisumu émemaki na kufa, bongo mpe bato bákoka sikawa koyangela na bosembo na nzela ya Moto Moko, Klisto Yesu; mpe ezali te lokola lisumu, atako ezalaki mpenza mabe, kasi sikawa mingi koleka ezali likabo na Ye mpo na bomoi ya seko.

Mpe talá Ye, azali kotambola katikati ya bato oyo asili kosikola, elingi koloba lingomba na Ye. Bongo baoyo basikolamaki bazalaki banani? Mingi kati na bango bazalaki te lokola Polo, babomi mpe bato ya kanyaka? Mingi bazalaki te lokola moyibi oyo azalaki kokufa, bayibi mpe babomi ya bato? Bango nyonso bazali mbano ya ngolu na Ye. Bango nyonso bazongisamaki na bomoi. Bango nyonso bazwaki BOMOI kati na Klisto Yesu, Nkolo.

Nazali komituna soki botyaki likebi na mbote oyo epesamaki na eleko ya liboso mpe na oyo epesamaki na eleko oyo. Bokangisa bobele yango elongo. "Makambo oyo elobi Ye oyo asimbi minzoto nsambo na loboko na ye ya mobali mpe Ye oyo azali kotambola katikati na mangomba. Makambo oyo elobi Moto ya Liboso mpe ya Nsuka, Oyo akufaki mpe azali na bomoi. " Oyo ezali bobele moto moko wana. Mpe Azali koyebisa biso ete lingomba ezali ya Ye.

Lokola mombóto ya mbuma ezali na katikati ya mbuma, ndenge moko mpe Ye, Mombóto ya Bokonzi, azali katikati ya lingomba. Lokola bobele mombóto nde ezali na bomoi, ndenge moko mpe Ye azali mobandisi ya bomoi mpo na lingomba. Kotambola na Ye elingi koloba ete Azali kokengela yango na kozanga kolemba. Azali Mobateli Monene ya bampate oyo azali kokéngela likolo na baoyo ya Ye. Ezali makoki na Ye, mpamba te Asombaki lingomba yango na makila na Ye moko. Makila yango ezali makila ya Nzambe. Nkolo ya lingomba yango ezali Nzambe, Nzambe mpenza. Azali 'Moto ya liboso mpe Moto ya nsuka.' Ebengelo wana ezali komonisa Seko na seko. Akufaki mpe azali na bomoi. Afutaki motuya, yango wana Ye moko nde azali nkolo ya tempelo ya Nzambe. Azali koyangela yango. Basambelaka ye kati na yango. Ayinaka moto nyonso oyo azali kozwa esika ya Nkolo mpe bokonzi oyo ezali ya Ye. Na ntembe te ntina oyo Amilakisaka na eleko moko na moko lokola Nzambe ezali mpo na kokebisa mpe kobóndisa bato. Akebisi mowiti ya lokuta, mpe Abondisi mowiti ya solo. Ye nde Nzambe MOKO YA SOLO OYO YA NGUYA NYONSO. Bóyoka Ye mpe bótikala na bomoi.

### **BIZALELA YA ELEKO YANGO**

Emoniseli 2: 9,

*"Nayebi misala na yo mpe bolozu na yo mpe bobola na yo (kasi ozali mozwi), nayebi mpe kotuka ya baoyo bazali koloba ete bazali Bayuda, nzokande bazali Bayuda te, kasi bazali nde eyanganelo na Satana."*

Emonani mpenza ete fungola ya eleko oyo ezali minyoko. Soki minyoko ezalaki na eleko ya liboso, esakolami sikawa ete minyoko ekobakisama na eleko mobimba ya mibale. Na ntembe te maloba ya Polo

oyo etalelaki ebele ya baklisto bisika nyonso oyo bazalaki na mokili mpe na bileko nyonso.

Baebale 10:32-38,

*"Kasi bókanisa lisusu mikolo ya liboso, oyo na nsima na bino kongengisama, boyikaki mpiko kati na minyoko ya makasi;*

*Na ngámbo moko, bazalaki kofinga bino mpe konyokola bino na miso ya bato nyonso; mpe na ngámbo mosusu bozalaki kosangana na baoyo bazalaki konyokwama na makambo ya ndenge wana.*

*Mpamba te, boyokelaki ngai mawa na minyololo na ngai, mpe bondimaki na esengo ete babotola bino biloko na bino, mpo boyebaki kati na bino moko ete na lola bozali na bomengo ya kitoko mpenza mpe oyo ekowumela libela.*

*Boye, bobungisa elikya na bino te, mpamba te lifuti monene ekangani na yango.*

*Na bongo bosengeli na motema molai, mpo ete sima na bino kokokisa mokano ya Nzambe, bokoka kozwa biloko oyo Alakaki.*

*Mpo ete etikali bobele mwa ntango moke, ete Ye oyo azali koya Akoya mpe Akoumela te.*

*Sikawa, moyengebene akobika na kondima: kasi soki moto moko azongi nsima, molimo na ngai ekosepela na ye te."\**

Bato ya mitema sembo oyo bazali kosangana na basambeli ya solo bakoki kobomama mpo na boboto na bango.

Sikawa Nkolo Nzambe Mozwi na Nguya Nyonso alobi : "NAYEBI." Ye wana azali kotambola na kati ya bato na Ye. Ye wana, Mobateli Monene ya etonga. Kasi, azali nde kopekisa minyoko? Azalaki nde kopekisa bolozu? Te, Azali kopekisa yango te. Azali bobele koloba : "NAYEBI bolozu na yo, Nazali ata moka te kobosana mpasi na yo." Oyo nde libanga ya kobeta libaku mpo na bato mingi! Lokola Yisalaele, bazali komituna soki Nzambe mpenza alingaka bango. Ndenge nini Nzambe akoki kozala sembo mpe na bolingo soki ateleme kaka mpe azali kotala ndenge bato na Ye bazali konyokwama?

Ezali yango nde batunaki na Malaki 1:1-3,

*"Bozito ya Liloba na Nkolo epai ya Yisalaele na nzela ya Malaki.*

*Ngai nalingaki bino, elobi Yawe. Kasi bino bozal kotuna Ngai : Eloko nini ezali kolakisa ete Olingaki biso? Esau azalaki ndeko ya Yakobo te? Elobi Yawe : Nzokande Nalingaki Yakobo,*

*Kasi nayinaki Esau; bongo nabongolaki bangomba na ye esobe mpe nakabaki libula na ye epai ya banyama ya zamba."*

Bomoni, bakokaki te kososola bolingo ya Nzambe. Bakanisaki ete bolingo elingaki koloba kozanga komona mpasi. Bakanisaki ete bolingo ezali lokola mwana moke oyo baboti bazali kobatela. Kasi Nzambe alobaki ete bolingo na Ye ezali bolingo ya "kopona". Elembeteli ya bolingo na Ye ezali KOPONAMA : ata soki nini ekoki kosalema, bolingo na Ye emonisamaki solo na likambo oyo ete baponamaki mpo na lobiko, (mpamba te Nzambe aponaki bino mpo na lobiko na nzela ya kopetolama ya Molimo mpe bondimi ya bosolo). Akoki kopesa yo na liwa lokola asalaki yango na Polo. Akoki kolekisa yo na mpasi lokola Asalaki yango na Yobo. Ezali nde litómba na Ye. Azali mokonzi. Kasi nyonso wana ezali na ntina. Soki Nzambe ázalaka na mokano te, wana alingaki kozala mobandisi ya mpasi kasi ya kimya te. Mokano na ye ezali ete nsima na biso konyokwama mwa ntango moke, tókoma na kobonga be, tótyama, tólendisama mpe tófandisama. Ndenge Yobo alobaki: "Azali kopesa biso makasi." (Yobo 23:6b) Bomoni ete Ye moko anyokwamaki. Ayekolaki botosi na nzela ya bampasi oyo Amonaki. Akómisamaki kutu moto oyo abongi be na nzela ya makambo oyo anyokwamaki.

Baebale 5:8-9,

*"Atako azalaki Mwana, kasi ayekolaki botosi na nzela ya bampasi oyo amonaki;*

*Mpe sima na Ye kokómisama na kobonga be, Akómaki mobandisi ya lobiko na seko mpo na baoyo nyonso bazali kotosa Ye."*

Na elobeli ya polele, ezaleli mpenza ya Yesu ebongisamaki be na bampasi. Mpe lokola Polo alobi yango, Atikelaki lingomba na Ye motango moko ya mpasi mpo ete bango mpe, na nzela na bondimi na bango na Nzambe, wana bazali konyokwama mpo na Ye, bákóma na bobongi be. Mpo na nini Alingaki bongo?

Yakobo 1: 2-4,

*"Bandeke na ngai, bótánga yango lokola esengo monene wana bozali kokutana na mimekano ndenge na ndenge;*

*na koyebáká ete komekama ya kondima na bino ebotaka motema molai.*

*Kasi motema molai esengeli kokokisa mosala na yango mobimba, mpo ete bózala bato oyo bakoki mpe babongi na makambo nyonso, baoyo bazangi mpámela.*

Mpo na nini Azali kosala eloko te? Ntina ezali kati na Baloma 8:17-18,

*"Mpe soki tozali bana, tozali mpe basangoli ya libula, basangoli ya libula ya Nzambe, mpe basangoli ya libula elongo na Klisto, Soki tokoyoka mpasi elongo na Ye, mpo ete tokoka mpe kozwa nkembo elongo na Ye.*

*Mpamba te nandimi ete bampasi ya ntango ya lelo ebongi te kokokanisama na nkembo oyo ekomonisama kati na biso."*

Soki tozali konyokwama elongo na Ye te, tokoki koyángela elongo na Ye te. Mpo na koyángela, osengeli konyokwama. Ntina na yango ezali ete moto akómaka na bizaleli ya malamumu te kozanga konyokwama. Ezaleli ya malamumu ezali ELONGA, kasi ezali likabo te. Moto oyo azangi bizaleli akoki koyángela te, mpo nguya oyo ezangi bizaleli ezali ya Satana. Kasi nguya elongo na bizaleli malamumu ebongi mpo na koyángela. Mpe lokola Ye alingi ete biso tokabola ata kiti na Ye ya bokonzi na moboko moko oyo Ye alongaki mpe afandi na kiti ya bokonzi ya Tata na Ye, boye tosengeli kolóngá mpo na kofanda elongo na Ye. Mpe mwa mpasi ya ntango moke oyo tozali koleka na yango sikawa ebongi te kokokanisama na nkembo monene oyo ekomonisama kati na biso ntango Ye akoya. Oh, bozwi nini oyo ezali kozela baoyo bablemi mpo na kokóta na bokonzi na Ye na nzela ya bolózi mingi!

*Bókamwa te na ntina ya mimekano makasi oyo ezali koya mpo na komeka bino."*

Yango nde Petelo alobaki. Ezali nde likambo ya kokamwa ete Nzambe alingi ete biso tókóma na bizaleli lokola oyo ya Klisto, oyo eyaka na nzela ya mpasi? Te, mbuta muntu. Mpe biso nyonso tozalaka na mimekano. Bisu nyonso tomekamaka mpe tozwaka etumbu lokola bana mibali. Ezali na moko te oyo azangi koleka na yango. Lingomba oyo ezali konyokwama te, mpe ezali komekama te, ezali na yango te—ezali ya Nzambe te.

Baebele 12:6,

*"Mpo ete Nzambe apesaka etumbu na moto nyonso oyo Ye alingaka, mpe abetaka mwana nyonso oyo Ye andimi. Kasi soki bino bolongolami na etumbu oyo bato nyonso bazwaka, wana bozali bana bazanga tata, kasi bana ya ndako te."*

Sikawa, ezalela wana ya lolenge na yango na Sumuluna esengeli kotyama na bileko nyonso. Ezali na eleko moko te oyo elongolami na yango. Ezali na mondimi ya solo moko te oyo alongolami na yango. Yango euti na Nzambe. Yango ezali mokano ya Nzambe. Ezali na ntina. Total na bosenga ete Nkolo alakisa biso bosolo ete tosengeli konyokwama mpe kozala lokola Klisto na kosaláká bongo. "Bolingó ezali na motema molai mpe ezali na boboto."

Matai 5:11-12,

*"Esengo na bino ntango bato bakofinga bino, mpe bakonyokola bino, mpe bakokosela bino makambo mabe ya ndenge na ndenge likolo na Ngai.*

*Bósepela mpe bótonda na esengo, mpo ete mbano na bino ezali monene na Likoló, mpamba te ezali mpe bongo nde banyokolaki basakoli oyo bazalaki liboso na bino."*

Likoló oyo etondi na mapata mpe mipepe makasi ya bomoi ezali te bilembo ya kozanga kondimama na Nzambe. Likolo oyo ezali kongenga na moi mpe mai ya kimia ezali mpe te bilembo ya bolingo mpe kondimama na Ye Andimaka moko na moko na biso bobele KATI NA MOLINGAMI. Bolingo na ye ezali ya kopona; mpe Azalaki na yango mpo na biso liboso ya ebandeli ya mokili. Ye alingaka biso? Ah, iyo. Kasi tokoyeba yango ndenge nini? Tokoyeba yango mpo ete ALOBAKI BONGO, mpe Amonisaki ete Alingaki biso mpenza mpo ete Amemaki biso epai na Ye moko mpe Apesaki biso Molimo na Ye, kotiaka biso na esika lokola bana mibali na Ye. Boye ndenge nini nakomonisa bolingo na ngai epai na Ye? Na kondimáká makambo oyo Ye alobaki, mpe na komitambwisáká na esengo kati na mimekano oyo Ye, na mayele na Ye, Apesi nzela ete esálema.

*"Nayebi bobola na yo (kasi ozali mozwi)."*

Yango oyo lisusu. Bótala Ye kotamboláká kati na Lingomba na Ye. Lokola tata, Azali kotala libota na Ye. Azali Mokonzi ya libota na Ye. Ye nde azali mopesi. Ye nde azali mobateli. Nzokande, Azali kotala bobola na bango. Oh, oyo nde libaku mpo na mondimi oyo azali na kondima ya makasi te! Ndenge nini

Nzambe akoki koyika mpiko kotala baoyo ya Ye na ntango ya bosenga mpe kaka kosukisa yango te, kasi kopesa mpe kosopa bozwi nyonso ya mokili likolo na bango?

Awa nde esika bosengeli mpenza kondima kati na bolingo, bolamu, mpe bwanya ya Nzambe. Oyo mpe, ezali na ntina. Bóbosana te toli oyo Apesaki ete: "Bómitungisa te mpo na mokolo oyo ekolanda, mpo na oyo bokolya to mpo na oyo bokolata. Tata na bino ayebi makambo oyo bosengeli na yango. Ye oyo alatisaka bafololo mpe aleisaka mokéngembóka, Akosala mingi koleka mpo na bino. Biloko ya ntina oyo bosengeli na yango na bomoi na bino ezali biloko ya mosuni te, mpamba te bomoi ya moto ezali te na biloko oyo azali na yango. Kasi bóluka liboso bokonzi ya Nzambe mpe boyengebene na Ye, mpe biloko nyonso ya mokili oyo bosengeli na yango ekobakisamela bino."

Bato ya Nzambe batyaka makanisi na bango na biloko ya mokili te. Makanisi na bango etyami likolo na Klisto. Balukaka te biloko ya motuya oyo ezali awa na nse; balukaka nde oyo ya likoló. Ezali mpenza solo, baklisto mingi bazali bazwi TE. Nzokande, bazali na ngámbo ya babólá. Ezalaki mpe bongo na ntango na Yesu. Ezalaki solo na ntango ya Polo, mpe esengelaki kozala solo lelo. Oh, ezali mpenza solo te lelo oyo, mpamba te eleko ya Laodikia ezali eleko moko ya bozwi mingi, wapi mbala mingi eloko oyo emonisaka ete moto azali moto ya molimo ezali ebele ya biloko ya mokili. Oh lala, boni lingomba ezali na bozwi mingi. Kasi boni ezali mobólá na Molimo. "Esengo na bino babólá, mpo bokonzi ya Nzambe ezali ya bino. Bokonzi na Nzambe ezali TE kolia mpe komela." Ezali biloko ya mokili te Ezali NA KATI na biso. Moto mozwi azali mozwi kati na Nzambe, na biloko ya mokili te.

"Oh," Molimo azali kolela, "Namoni bobola na bino. Namoni bosenga na bino. Bozali mpenza na mingi te, soki eloko moko ezali, ya komikumisa na yango. Oyo bozalaki na yango, babotoli bino yango. Na esengo nyonso, botikaki biloko na bino mpo na kozwa biloko ya seko. Bazali koseka bino. Bazali kotyola bino. Bozangi bozwi ya mokili oyo bokoki kobikela na yango. Kasi atako nyonso wana, bozali bazwi. Kobatelama na bino ezali kati na Ye Oyo azali nguba na bino mpe mbano na bino oyo eleki monene. Bokonzi na bino ezali naino koya. Kasi ekoya. Mpe ekozala bokonzi oyo ekoumela seko na seko. Iyo, nayebi mimekano mpe mawa na bino. Nayebi ndenge ezali mpasi mpo na kokoba. Kasi nakokanisa makambo nyonso oyo ntango nakozonga mpo nakokamata bino lokola bato na ngai, mpe na nsima Nakofuta bino."

Nzokande, yango ezali te mpo na kotélemela bazwi mpamba te Nzambe akoki kobikisa mozwi. Kati na bana na Nzambe, bazwi bazali. Kasi, mbóngo ekoki mpenza kozala motambo, kaka te mpo na baoyo bazali na yango, kasi mpe mpo na baoyo bazali na yango te. Kuna na eleko ya liboso, Yakobo alobaki na baoyo bazalaki kotalela bazwi ete: "Kondima na bino kati na Nkolo na biso Yesu Klisto ézala na koponapona te." Kuna, babola bazalaki koluka kopakola bazwi mafuta mpo ete básalisa bango, na esika ya kotyela Nzambe motema. Yakobo alobi: "Bósala yango te." "Bosala yango te. Mbóngo ezali nyonso te. Mbóngo ezali eyano te." Lelo mpe yango ezali eyano te. Tozali na bomengo mingi koleka liboso, nzokande moke mpenza ezali kosalema na Molimo. Nzambe asálaka na mbóngo te. Asálaka na nzela ya Molimo na Ye. Mpe mosala wana ya Molimo eyaka bobele na bomoi oyo emikabi na Liloba.

## EYANGANELO YA SATANA

Emoniseli 2: 9b :

*"Nayebi kotuka ya baoyo bazali koloba ete bazali Bayuda, nzokande bazali Bayuda te, kasi bazali eyanganelo ya Satana."*

Talá verse moko oyo ekomema makanisi ya motuya mingi, kaka te mpo ezali mpenza ya kokamwa na makambo oyo ekomami na kati, kasi lisusu ezali mpenza kozongelama na eleko oyo ekoya mbula nkóto na nsima.

Emoniseli 2: 9

*"Nayebi misala na yo, bolozzi na yo, mpe bobólá na yo (kasi ozali mozwi), Nayebi mpe kotuka ya baoyo bazali koloba ete bazali Bayuda, nzokande bazali Bayuda te, kasi bazali eyanganelo ya Satana."*

Mpo na kobanda, liloba oyo Bayuda, ezali te kolimbola losambo ya Bayuda. Ezali bobele kolobela bato ya Yuda; mpe ezali mpenza na ndimbola bobele moko lokola soki ngai nalobi ete nazali moto ya mboka Irlande. Bato oyo bazalaki koloba ete bazalaki mpenza Bayuda, Bayuda ya solosolo ya mbotama. Bazalaki bakosi. Bazalaki Bayuda te na mbotama na bango mpe bazalaki Bayuda te na lolenge ya kosambela.

Soki nyonso oyo ezali solo, bazalaki ba nani? Bazalaki bato oyo bakosamaki mpe basilaki kozala eteni ya lingomba. Bazalaki na kati ya mowiti ya lokuta.

Bazalaki bato ya lingomba ya solosolo te, kasi ya lingomba ya lokuta mpo Nzambe alobaki ete "bazali eyanganelo ya Satana." Nzokande, liloba mpo na eyanganelo ezali liloba moko te na oyo tosalemela mpo na lingomba. Na kati ya Biblia, lingomba elingi koloba "baoyo babengami mpo na kobima", to "baoyo

babengami na libándá ya". Mokomi ya Nzembo alobaki na ntina na baponami wana ete:

*"Esengo na moto oyo YO OPONI, mpe OSALI ete ápúsana penepene na Yo, ete akoka kofanda na lopango na Yo."*

Nzembo 65:4.

Kasi eyanganelo elingi koloba "lisanga to liyangani." Yango ekoki kozala malamumu to mabe, kasi awa, ezali mabe; mpamba te baoyo, kosangana na bango ezali ya Nzambe te kasi ya bangomei. Yisaya alobaki na ntina bango ete :

*"Tala, na ntembe te bakosangana elongo, kasi NA NGAI te: moto nyonso oyo akosangana kotelemela yo akokweya na ntina na yo." Yisaya 54:15.*

Boye, lokola bato yango bazalaki mpenza kotelemela mowiti ya solo, mokolo moko, Nzambe akoboma bango.

Sikawa mpo na nini tozali na bato oyo basangani na lingomba mpe bazali komibenga Bayuda? Ntina ezali oyo: Lokola bazalaki bakosi, bakokaki koloba nyonso oyo balingaki. Bakokaki koloba makambo oyo balingaki lokola nde ezalaki solo, mpe na nsima kokangama na yango. mpe na yango, bakoki kozala kokosa ná likanisi moko monene na makanisi na bango. Ezalaki bongo te ete lingomba ya ebandeli ezalaki pene na mobimba na yango to na mobimba na yango bobele na Bayuda, kokómisáká bango binama ya ebandeli ya nzoto na Ye? Bantóma zomi na mibale bazalaki Bayuda, mpe bantoma oyo bayaki na nsima bazalaki Bayuda to baprozélite. Na yango, soki bato bazalaki kolapa ndai ete bazali Bayuda, yango elingaki kopesa bango esika ya liboso mpe komonisa ete bazali bato ya ebandeli ya lingomba. Loba lokuta. Kangama na yango. Kotala te bosolo to mambi ma kala. Loba bobele yango mpe koba koloba yango na bato, mpe kala te bato bákoyamba yango.

Sikawa bino bososoli eloko moko na esika wana? Ezali te molimo moko wana mpenza kati na lingomba lelo? Ezali te na etuluku moko oyo elobaka ete bango nde lingomba ya solo ya ebandeli, mpe ete lobiko ezali bobele kati na yango? Bazali nde koloba te ete bazali na bafungola ya bokonzi oyo bazwaki epai ya Petelo? Bazali nde koloba te ete Petelo azalaki pápa na bango ya liboso, mpe ete azalaki kofanda na Loma, nzokande ezali MPENZA NA LISOLO MOKO TE YA KALA OYO ETALISI BONGO? Mpe ata balandi na ye oyo batángá mingi mpe bayebi makambo mingi bandimaka lokuta na ye. Eyanganelo ya Satana! Mpe soki Satana azali tata na ye, mpe azali tata ya lokuta, na bongo ezali likambo ya kokamwa te ete baoyo bazali kati na eyanganelo na ye bazali mpe bato ya lokuta.

Tózwa ndakisa ya kotuka. Bato wana ya eyanganelo ya Satana bazalaki te, na ndakisa oyo, kotuka Nzambe (atako yango elobami te), kasi bazalaki nde kotuka lingomba ya solo. Solo mpenza. Lokola Kaina anyokolaki mpe abomaki Abele mpo ye (Kaina) autaki na moto mabe wana, mpe lokola balandi ya lingomba ya misesano oyo ekufá ya Bayuda (Yesu alobaki ete bazalaki ya tata na bango, Zabolo) bamekaki koboma baklisto na bambula ya ebandeli ya eleko ya liboso, sikawa etuluku yango kaka (nzete ya mowiti ya lokuta) ezali komeka na makasi mpenza koboma bandimi ya solo na eleko ya mibale. Molimo wana ya motemeli na Klisto ezali kokóla.

Etuluku oyo ekotaki mokemoke kati na lingomba na nzela ya misala na yango (Nikolaïsme) ezali lisusu kobanga te ete eyebana, kasi ebongisami polele na etuluku ya bato oyo bango moko basangisi mpe ezali kobundisa lingomba ya solo na bonguna oyo ebombami te.

Boye ntango nalobi ete yango ezalaki lingomba ebongisami ya batemeli na Klisto, nazali kopesa bino bosolo oyo euti na lisoló ya kala oyo endimami. Lingomba ya liboso oyo ebandisamaki na Loma (tokolobela lisoló na yango na eleko ya Pelegamo) esilaki kobongola bosolo ya Nzambe na lokuta na kokotisáká lingomba ya bapakano, oyo ezalaki na bankombo mpe na ndimbola ya boklisto. Na eleko ya mibale, lingomba yango ekotaki mpenza na bopakano (atako ezalaki koloba ete ezali lingomba ya solo) na lolenge ete Polycarpe asalaki mobembo ya kilometele soki 2500, atako akómaki mpenza mobange, mpo na kobondela bango ete bázonga na nzela. Balingaki kosala yango te. Bazalaki na molongó ya bakonzi mpe ebongiseli ya makasi, mpe batikaki mpenza Liloba. Na bongo, oyo ezali eyanganelo ya Satana, etondi na maloba ya kotuka, oyo kati na yango esilaki kozala na mimboti ya mateya ya ba-Nikolaiti, mpe oyo kala te ekómaki esika mpenza to nguyu ya lingomba ya Satana. Yango ezali mpenza solo, mpo Emoniseli 2:9b elobi TE ete bato oyo bauti na eyanganelo ya Satana, kasi elobi ete BAZALI EYANGANELO YA SATANA

Molimo wana ya motemeli ya Klisto ezali ya sika te. Oyo ezali te likambo oyo ebandaki bobele na bileko ya lingomba. Ezali awa uta ebandeli. Mpo na kososola malamumu ndenge nini esalaka, ndenge nini etelemelaka Nzambe mpe ndenge nini ezwaka bokonzi likola na lingomba, totala ye na Kondimana ya Kala. Tika ete tótala malamumu molimo oyo ndenge ezalaki kotalisama na Yisalaele wana abimaki na Ezipito mpo na kozala lingomba kati na esobe.

Lokola lingomba ya liboso ebandaki na mosala ya peto ya Molimo Mosantu ná bilembo, makamwisi, bimoniseli lokola bisakweli, koloba minoko ya sika, mpe kolimbola, bwanya, boyebi mpe kobikisa babeli,

ndenge moko mpe na mikolo ya Yisalaele, ntango babimaki na Ezipito, bazalaki na nse ya bokambami ya Molimo Mosantu oyo emonisamaki na nzela ya makabo. Nzambe nde azalaki kokamba bato. Ya solo, Azalaki Mokonzi na bango. Azalaki Tata-Mokonzi. Azalaki kobatela Yisalaele lokola tata abatelaka libota na ye. Azalaki koleisa bango, kobunda bitumba na bango, kolongola ba mpasi na banyo mpe kosilisa mikakatano na bango. Amipesaki mosala mpo na bango. Bazalaki ekólo bobele moko oyo mpo na yango, Azalaki mpenza Nzambe. Kasi mokolo moko babandaki kotalatala zingazinga, bongo bamonaki Bafilistia mpe bikólo mosusu oyo ezalaki na bakonzi likolo na bango. Yango ebendaki likebi na bango mpe bazwaki ekateli ya kokómisa bokonzi na bango lokola ya bato, yango wana balingaki mokonzi. Nzokande Nzambe Ye moko alingaki kopesa bokambami na moto, na nzela ya Moto Nkolo Yesu Klisto, kasi bango basalaki yango liboso na Ye. Satana ayebaki mwango ya Nzambe, yango wana atyaki kati na mitema ya bato ete bákende liboso na Nzambe (Liloba).

Ntango babelemaki na Samwele mpe baséngaki mokonzi, Samwele atungisamaki mingi na lolenge ete motema na ye elingaki kotelema. Nzambe azalaki kokamba libota na Ye na nzela ya mosakoli wana oyo amikabaki, mpe atatolamaki na Makomi bongo ye amiyokaki ete aboyamaki. Asangisaki bato mpe abondelaki bango ete batika te Nzambe oyo amemaki bango lokola bana, Ayikisaki bango mpe Apambolaki bango. Kasi bazalaki kaka na mposa ya kosala yango. Balobaki na Samwele. "Otikálá ata moke te kokamba biso na libunga. Otikálá kozanga bosembo ata moke te na makambo ya mbóngo. Osali nyonso oyo okoki mpo na kobatela biso na molongó ná Liloba ya Nzambe Tosepeli mpo na makamwisi, bwanya, biloko mpe kobatelama ya Nzambe. Tondímaka yango. Tosepelaka na yango. Lisusu, tolingi te kobika kozanga yango. Ezali bobele ete tolingi mokonzi oyo akokamba biso na etumba. Kasi ezali solo ete, ntango tokokende na etumba, mposa na biso ezali kaka ete banganga-nzambe bákende liboso mpe bato ya Yuda bálanda bango, mpe biso tokobéta bakelelo, tokogánga mpe tokoyemba. Tozali na likanisi ya kotika ata moko ya makambo wana te. KASI TOLINGI MOKONZI OYO AZALI MOKO NA BISO MPO NA KOKAMBA BISO."

Bongo Nzambe alobaki na Samwele. "Omoni, bango baboyi yo te, kasi baboyi ete NGAI názala na bokonzi likolo na bango."

Oyo nde likambo ya mawa! Bayebaki te ete ntango bazalaki kosenga na Nzambe ete atika bango bázala lokola bato mosusu ya mokili, bazalaki nde koboya Ye, mpamba te Nzambe abongisaki ete libota na Ye bázala na etamboli oyo ekeseni na oyo ya bato ya mokili. Bazali bato ya mokili te mpe bamonanaka lokola bato ya mokili te mpe basalaka makambo lokola bato ya mokili te. Babakami na ekululu mpo na mokili mpe mokili ebakami na ekululu mpo na bango.

Bakolinti 6:17-18,

*"Yango wana, bobima kati na bango mpe bokabwana, elobi Nkolo; mpe bosimba eloko ya mbindo te, bongo Ngai nakoyamba bino.*

*Nakozala Tata mpo na bino, mpe bino bokozala bana mibali mpe bana basi mpo na Ngai, elobi Nkolo Mozwi-ya-Nguya-Nyonso."*

Bomoni, bokeseni moko kati na Yisalaele mpe bikólo mosusu nyonso ezalaki Nzambe. Bótya Nzambe pembeni, mpe Yisraele elingaki kozala lokola bikólo mosusu nyonso. Ntango Samasona akataki nsuki na ye, akómaki lokola bato mosusu nyonso. Botya litambwisi ya Molimo Mosantu pembeni, mpe lingomba ezali ELOKO MOSUSU TE KASI MOKILI NÁ NKOMBO YA NZAMBE. Mokili mpe lingomba ezali nyonso na liboke moko, kaka lokola Yakobo mpe Esau bautaki na baboti moko, kasi Molimo ya Nzambe nde esalaka bokeseni.

Ata soki omibengi Moklisto, ezali na Nina te. Moto nyonso akoki kosala yango. Likambo ezali soki ozali na Molimo ya Nzambe kati na yo to te, mpamba te kozanga Molimo wana, okweisami; ozali ya Ye te. Amen.

Eleki kala mingi te, natunaki mwasi moko soki azalaki Moklisto. Alobaki na ngai ete, "Mbuta muntu, Nakolinga oyeba ete natumbaka buji butu nyonso." Boyokani nini mpenza ezali kati na yango? Nazali Metodiste, nazali Batiste, nazali Pantekotiste. Ezali ata na likambo moko te ya kosala na yango. Ezali nde kozala na Molimo Mosantu to kokufa.

Boye, na ebandeli mpenza, na lingomba ya ebandeli, bato babandaki kokanisa mpe kobánza lolenge nini bakoki kobongisa makambo ya Nzambe Misala ya Banikolaiti ebandaki komimonisa. Na nsima, etóngá moko esalemaki. Bakendeki mosika ya ndakisa ya Liloba. Esengi bobele kobongola liloba moko, mpe mwa mfulu wana moke ekovimbisa mampa mobimba. Mpo ete ye oyo akobuka mobeko bobele moko, akweisami na nyonso. Eva abongolaki bobele liloba moko. Yango ekweisaki nyonso.

Boye ntango kaka etuluku wana ya Satana esalemaki, ebandaki koyina mpe kobundisa bandimi ya solo, kolobáká na makasi ete bango nde (bapaya) bazalaki lingomba ya solo ya Nzambe.

Botála ndenge ebongiseli ebotaka koyina. Ebebisaka bondeko. Ebimisaka bololo. Yango nde mila elingi



koloba. Sumuluna etondaki na yango. Bololo. Mosisa ya bololo ebebisaka bato mingi. Na bongo, mbindo mingi ebandaki kokota. Eleko moko na moko ekozala na bilembo na yango.

Lingomba ya Sumuluna ekendeki mosika na oyo ya ebandeli. Ekomaki oyo mimboto misangisami. Esangisaki mimboto lokola Eva asalaki. Boyebi ete eloko oyo esangana euti na bosangisi ya mitindo mibale. Eloko ekobimisa na nsuka ekozala lisusu peto lokola ya ebandeli te. Ezali oyo basangisi. Nzokande, ntango Eva atikaki ete nyama esangisa mombóto na ye na oyo ya ye Eva, abotaki ekelamu moko na nkombo Kaina, oyo azalaki mpenza moto te. Autaki na OYO YA MABE. Botala ndenge akeseneki na Abele. Botala ndenge akeseneki na Seti. Ayinaki Nzambe, alingaki kotósa Liloba te, bongo anyokolaki mpe abomaki moyengebene. Amityaki likolo ya Liloba na Nzambe.

Lingomba mpe, etiki lolenge ezalaki na ebandeli. Esangisami mimbóto. Na maloba mosusu, lingomba ya nkombo mpamba ezali oyo mimbóto misangana. Bato balobaka: "Nazali Batiste." Ezalaki bongo te na ebandeli. "Nazali Methodiste." Ezalaki bongo te na ebandeli. Na esika ya Liloba ya sembo ya Nzambe, na esika ya bato oyo batondisami na Molimo na kati ya lingomba, baoyo batambwisamaki na emoniseli oyo epesamaki na Molimo, tozali sikawa na bindimeli, mibeko, mpe makanisi ya bato oyo batángá mingi. Boyekoli ezwi esika ya emoniseli. Makanisi ezwi esika ya kondima. Mwango ya bato ezwi esika ya masanzoli ya pwasa kati na Molimo Mosantu. Ezalaki bongo te na ebandeli. Lolenge mobimba ebongwani. Ekomi lingomba oyo mimbóto misangáná.

Bongo, ntango lingomba ekómi oyo mimbóto misangáná, ekobota Baklisto ya peto? Ekoki te. Bomoj to mombóto oyo ememaka baklisto na kobotama ezali kati na bango te. Lolenge moko ebimisaka engebene lolenge na yango Ba-Batiste bakobota ba-Batiste mingi koleka, mpe basalaka makambo lokola ba-Batiste. ba-Methodiste bakobota ba-Methodiste; mpe basálaka lokola ba-Methodiste. Moko te kati na bango ayebani mpo na nguya ya Nzambe, bakoki mpe te, mpamba te nguya yango ezali wana te. Bayebani na milulu na bango ya kosambela Nzambe, na bindimeli mpe mateya na bango.

Ozali koloba na ntina na oyo mimboto misangáná! Boyebi nyama oyo eyebani mingi na mokili mpe euti na bosangisi mimboto mikeseni? Ezali elongo na biso uta kalakala. Ezali mbalata. Ezali kosangisama ya mpunda ná farása. Azali nyama moko ya kokamwa. Akoki kobota te. Azali te na bomoi kati na ye mpo na kosala yango. Kasi, lobá na ntina na mosala! Akoki kosala mosala makasi koleka farása to mpunda. Kasi botala lolenge na ye. Azali motó makasi mpe okoki kotyela ye motema ata mokolo moko te. Azali etaliseli ebongi be ya losambo oyo mimboto mikeseni misangisama. Kosangisama ya bosóló ná molili, mpo ete farása ezali etaliseli ya mondimi ya solosolo mpe mpunda etaliseli ya moto oyo azali sembo te. Sangisa bango mpe okozwa kosambela oyo ebotaka te, ya momesano. Ezali na mombóto ya bomoi te. Asili kokufa. Ekoki koloba na ntina na bosolo, kasi ekoki kobota yango te. Ezali na Nzambe kati na yango te, nzokande eyanganaka mpo na koloba na ntina na Nzambe, mpe na ntango yango kowangana na makasi nyonso nguya na Ye. Bakowangana Liloba na Nkombo mpenza ya Nkolo. Mpe elikia ata moko te ezali mpo na bango. Boyebi ete ata lingomba moko te oyo ebongisami etikala kozwa kolamuka? Soko moke te! Kaka ntango basalaki ebongiseli, bakufaki. Bakoki lisusu kozonga te. Te, mbuta muntu. Nakoki kotalisa bino yango na elilingi.

Na Eside 13: 13,

*"Okosikola mwana nyonso ya liboso ya mpunda na mwana na mpate; mpe soki osikoli ye te, okobuka nkingo na ye. Okosikola mpe mwana nyonso ya liboso ya moto kati na bana na yo ya mibali.*

Bomoni, mpunda akoki kosikolama. Mosumuki nyonso ya mawa akoki kosikolama na mbeka ya makila ya Yesu Klisto, to na kobwakáká Klisto, akobwakama ye moko. Kasi okosikola mbalatá te. Lisiko ezali te mpo na ye. Makila ezali te mpo na ye. Ekoki kosalema te; mpamba te mbalatá ezwaka ebombelo kati na losambo, nzokande mpunda ezwaka ebombelo kati na makila. Mbalatá azali te kati na ye na momboto oyo ekoki kozua bomoi, kasi mpunda azali na momboto.

Eleki mwa bapóso, natangáki kati na zulunalo moko. Ya solo, ezalaki Lisolo moko na zulunalo oyo ekomamaki na moto moko ya mombóngo oyo abikisama te; na Moklisto te. Alobaki ete azalaki kokamwa na mangomba. Akokaki kososola bango te. Bazalaki na baseminele oyo etondaki na balakisi oyo bazalaki koteya Liloba ya Nzambe na itina ya kobebisa yango. Na bongo, moto wana akokaki kososola yango te. Akamwaki mingi mpo na yango. Alobaki ete akokaki kososola moto oyo andimaka te ete Nzambe azali to oyo azali koministe, to moto oyo azali na bonsomi ya makanisi, to moto mosusu nyonso oyo azali kosala bongo. Kasi ntango lingomba yango moko ebomaki Liloba na Nzambe, yango ekanakani na kokana liboso mpo na koboma moto. OYO NDE LOSAMBO NA BINO YA MIBONTO MISANGANA. AMERIKA: Lamuká liboso ete ntango eleka!

Ntango lingomba ekeyi mosika na Liloba, ekondima eloko nyonso. Ezali lokola Eva. Ntango Kaina abotamaki, ye Eva alobaki: "Nasali moto na lisungi ya Nkolo." Sikawa bozali kososola ete ye alingaki mpenza koloba bongo? Akanisaki ete azwaki moto uta na Nkolo. Bomoni, ntango akosamaki mpo na kondima liloba ya Satana na esika ya Liloba ya Nzambe, akanisaki ete nyonso oyo alobaki ezalaki solo.

Soki alobaki ete azwaki moto uta na Nzambe, na bongo azwaki moto uta na Nzambe. Kasi, Nzambe atyá mibeko na molóngó na Ye. Momboto ya malamú ekoki kobota bobele mbuma ya malamú mpe momboto ya mabe ekobota bobele mbuma ya mabe. Sikawa mbóto moko na moko, atako ekeseni, ekosalela mabelé moko, bilei moko, mayi moko, mpe moi moko; kasi ekobota moko na moko na lolenge na yango. Botala lisolo ya molongó ya Kaina. Botala lisolo ya molongó ya Seti. Bokeseni bobele moko kati na bango : mombótó ya ebandeli. Eloko mosusu te.

Soki botali maloba wana ya Eva na bokebi mpenza, bokomona ete azalaki na bososoli ya malamú koleka ndenge bato mingi bakanisaka. Alobaki te ete mwana yango autaki na Satana mpo yango elingaki kosala ete Satana ákokana na Nzambe. Bobele Nzambe nde akokaki kokela likei na libumu na Malia. Satana, akokaki kosala yango te. Eva ayebaki yango. Satana akoki bobele kobebisa. Na bongo apengwisaki mwasi na mombóto ya mabe. Ezalaki mombóto ya nyoka nde ebimisaki Kaina. Ezalaki mombóto ya Adama nde ebimisaki Abele ná Seti.. Mimbóto wana elekaki na nzela ya lolenge moko mpenza, kasi bana bakesanaki mpo ete bautaki na mimbóto mikeseni.

Andimaki ete Kaina autaki na Nzambe. Andimaki lokuta ya zabolo lokola soki azalaki bosolo ya Nzambe. Yango mpenza nde likambo oyo tozali na yango sikawa. Mangomba bamitalisaka lokola maziba ya bosolo, kasi bosolo ezali kati na bango te; nzokande bana na bango oyo baboti batielaka mpenza bango motema mpe bakoki ata koboma mpo na kolongisa libunga na bango.

Soki bokanisi ete nalekisi ndelo, botánga 2 Timote mokapo ya misato mobimba, mpe milongo mitano ya ebandeli ya mokapo ya minei.

Timote 4: 1-5

*"Yango wana, Napesi yo etinda liboso ya Nzambe, mpe Nkolo Yesu Klisto, Oyo akosambisa bato ya bomoi mpe bakufi na ntango ya komonana na Ye mpe na bokonzi na Ye;*

*Teya Liloba, teya yango na molende nyonso ezala na ntango ya malumu to na ntango ya mabe, zongisa na nzela, pamela, mpe lendisa na mateya na yo mpe na kokanga motema.*

*Mpo ete ntango ekoya, wana bato bakolinga lisusu te koyoka mateya ya solo, kasi na kolanda mposa na bango moko, bakomilukela balakisi mpo na kosepelisa matoi na bango.*

*Mpe bakolongola matoyi na bango na bosolo, mpe bakobaluka epai ya masapo.*

*Kasi yo, zala na ekenge na makambo nyonso, yika mpiko na bampasi, sala mosala ya mopalanganisi Nsango Malamú, kokisa malamú lotomo na yo."*

Ntango lingomba emipesaki nzela ya kolongwa na oyo ya ebandeli, lokola Adama ná Eva, liwa ekotaki.

Nguya ezali kati na ye te. Okómi eloko moko ya nsomo. Ntango lingomba ekendeki na mimesano mpe na milulu, mpe na bonganzambe na kobongisáká bateyi na etuluku moko oyo ezalaki kozwa ekateli ya bokambi libanda na Molimo Mosantu mpe na Liloba na Ye, kaka na ngonga wana liwa ekótaki mpe lingomba ebandaki kobela, mpe ntango ezalaki kobela, ebongwanaki na etuluku moko ya bato oyo bazangi nguya mpe oyo bazalaki na ebundeli bobele moko; kowelana. Akokaki kobimisa eloko moko te kati na Molimo, mpamba te bilikya na ye bitongamáki na manáka kasi na kondima kati na Liloba na Ye te. Lokola balonaki manáka, babukaki manáka. Balonaki libebi, babukaki bana oyo babeba.

Osakani ná Nzambe, mpe obuki kaka oyo okotisaki. Moto asengelaki koyekola yango na bikelamo. Abebisi bikelamu. Akotisaki makanisi na ye moko kati na bikelamo mpe abongisaki lisusu binama mikemike mpe bongo na bongo; mpe sikawa, azali kobuka mopepe makasi. Botala ndenge babokoli ba nsoso. Babongisi mpe basangisi yango na lolenge ete, bakómi bamasini ya kobwaka makei oyo ezali kolemba likolo ya kobwaka makei. Ezali malamú te mpo na bilei mpe ezali petepete mpe ekoki na kolyama te. Bazali kokotisa biloko kati na mosuni oyo tozali kolya, na yango nzoto ya moto ezali kobongwana na lolenge ete basi bazali kokóma na lokéto moke mpe mapeka minene mpe mibali bazali kokóma lokola basi. Sikawa, soki osali bozóba na bikelamo mpe ezongiseli yo makambo ya nsomo, nini ekosalema soki obongoli solo na lokuta? Eyano ezali ete, okobóta motemeli ya Klisto, ebongiseli ya lingomba oyo ezangi Nzambe, oyo ebebá mpenza na lolenge ete ekozala lisusu lokola oyo ya ebandeli te mpe ekobimisa lisusu eloko moko te lokola oyo ya ebandeli. Eyano bobele moko ya Nzambe na likambo ya ndenge wana ezali libeke na móto.

Eleko wana ya mawa ya Sumuluna ezalaki kokufa. Ntango ekufaki, ezongaki lisusu te. Eleko moko te ezongelaka. Kolamuka moko te ezongaka lisusu. Ekoki te kozala na bomoi ya Nzambe kati na yango na nzela ya kobotama ya nzoto. Esengaka kobotama lisusu uta na likoló. Eleko oyo ya nsuka ebandaki na móto ya kolamuka ya Pantekote, mpe nsima bazongaki na ebongiseli Na esika ya kozwa Liloba, bazwaki makanisi na bango moko mpe basalaki bobele oyo eleko moko na moko salaki : batyaki búku na esika ya Liloba. Soki kaka obimi libanda na oyo búku yango elobi, okomóna nini ekosalema. Ndeko, bakobengana yo. Bongo bakonyokola yo, mpe bakoloba ete ezali Nzambe. Mpe boni balingi bibongiseli na bango!

Kokamwa te. Bazali bato ya libota ya mibale ya Pantekote mpe lokola Nzambe azalaka na bankoko te, bazali bobele bana ya batata na bango, oyo bayebani na bindimeli na bango mpe na lolenge na bango ya kosambela. Bakoki kolobela makambo oyo eleká, kasi bakoki kosala yango lisusu te. Liboso, bazalaki na mikalikali, kasi sikoyo batikali bobele na nkake.

Kasi tiká bango básolola na yo na ntina na nkembo ya lingomba na bango. Bakoloba: "Iyo tata, nalingi oyeba ete yango ezali eloko moko oyo moto te nde abandisi yango. Eyaki yango moko. Molimo ekweyaki na mokili mobimba. Iyo mbuta muntu, tozali na oyo bazalaki na yango na Pantekote. Yango eutaki na bato te kasi na Nzambe. " KASI MPO NA NINI BABATELAKI YANGO NDENGE WANA TE? SOKI NZAMBE NDE ABANDISAKI YANGO, MPO NA NINI NZAMBE AKOKAKI TE KOBATELA MPE KOSILISA YANGO? Soki Nzambe akomaki te búku ya bindimeli, mibeko mpe mateya mpo na kobanda yango, boye makoki nini bazalaki na yango mpo na kosala bongo?

Nzambe asopaki Molimo na Ye likoló na ba Baptiste, ba Méthodiste, ba Nazarène, ba Adventiste, ba Presbytérien, Lisangá ya Bandeko, Lingomba ya Nzambe (mingi na bango babengamaka bongo), mpe bongo na bongo. Bandeko wana nyonso bakólaki na nse ya malakisi ya ndenge na ndenge, na nse ya mibeko ya lingomba, ya mikanda ya lingomba, mpe bongo na bongo. Nzambe abwakaki yango nyonso pembeni; Abebisaki mateya na bango ya mibeko mpe azongisaki makabo ya Molimo, komonisáká ete Azali ndenge moko lobi mpe lelo mpe libela na libela. Kasi, ba-pantekotiste wana bazwaki nde liteya na bango na ntina na ebongiseli? Ata moke te. Bazongaki na ebongiseli mpe bakomaki mikanda na bango ya mateya, ya mibeko mpe búku ya lingomba, búku ya bondeko, mpe bongo na bongo; ná likanisi bobele moko: ya komonisa ete bazali sikawa na bosóló nyonso, ete bayebi biyano nyonso, mpe ete bazali na bongo bato ya lokumu ya Nzambe oyo bayebi nzela, mpe bakoki kolakisa yango na basusu, lokola batambwisi oyo baponami na Nzambe. Kasi bazali na yango te. Basangisaki mimboto na bango kaka lokola bitonga epai wapi babimaki. Soki balingi kozala kati na Mwasi ya libala, ekosengela na banco kobima, kaka ndenge bankoko na bango basalaki.

bazali lokola bamosusu nyonso. kolamuka esili. Bazali komeka kobika na nkombo kasi bakufá. Bazuaki ebongiseli, kasi bakobaki koloba na ntina na Molimo ya Nzambe. Bazali kolobela elembeteli kotalisáká ete moto azali na Molimo Mosantu. Kasi babosani ete Zabolo mpe akoki koloba minoko na sika. Mobulungano monene ya Babilone ezali kati na bango mpe bazali kobenga yango Molimo ya Nzambe. Mbala moko lisusu tozali komona moto kotinda na Nzambe, na esika ete Nzambe átinda moto.

Sikawa okoki kozala na mposa ya kogangela ngai kaka awa mpo na makambo oyo nauti koloba. Malamu. Bamibengaka ba-Pantekotiste mpe bato na Nsango Malamu Mobimba. Tiká bango bámonisa yango. Na mokolo ya Pantekote, móto eyaki na lipata mpe ekabwanaki lokola lolemo mpe ekitaki likoló na moko na moko na bango. Móto ezali wapi? Na mokolo ya Pantekote, balobaki minoko ya sika, mpe bato oyo bayokaki bango basosolaki. Yango ezali wapi? Bandimi nyonso bazalaki kosala lokola libota moko. Ba-Pantekotiste bakabwani makasi kaka lokola bituluku mosusu nyonso kati na masoló ya kalá. Moto moko te azalaki na mpiko ya komikotisa na lingomba ya ebandeli soki Nzambe abakisaki ye te. Bazali na bantaba mingi kati na bango lokola bituluku nyonso. Balobaka ete bazali bato ya Nsango Malamu Mobimba, kasi bakoki kotalisa yango polele te. Mangomba na bango ezangi nguya lokola mangomba mosusu nyonso. Soki bazali bato ya Nsango Malamu mobimba, wana malamú tóndima ete Biblia esalaki libunga ntango elimbolaki bato ya Nsango Malamu mobimba na Pantekote. Bayembaka: "Mbongwana monene esalemi kati na ngai." Ezali solo. Kasi mbongwana yango esalemi mpo na malamú te.

Ezali ntango ya kozonga epai na Nzambe. Bazali komibenga bato ya bomoi, nzokande basili kokufa. Koloba minoko ya sika ezali elembo ya kolamuka te. Ezali elembo ya liwa. Koloba minoko ya sika ezalaki elembo ete lingomba ya milulu ya Bayuda esilaki, ete eleko ya sika ebandaki. Minoko ya sika lelo ezali kosukisa bileko ya lingomba ya Mabota, mpe Nsango Malamu ezali kozonga epai ya Bayuda. Bato bazali koloba ete minoko na sika esakolaka mbongwana monene ya Molimo. Babungi nzela. Solo ezali ete yango ezali elembo ya nsuka ya makanisi, manaka mpe bokonzi nyonso ya bato, mpe bokonzi ya Nzambe ezali kokótisama. Libota na Nzambe, bolamuka! Bolamuka.

Soki bokanisi ete ezali solo te, bóyóka naino likambo oyo. Na mokili mobimba, na bituluku ya Bapantekotiste mpe ya bato ya moboko, bazali kosala bibongiseli ya bato ya mombongo. Batondisi esika ya koteya kozanga kobengama na Nzambe. Bazali komibénga baluki-bato mpe babandisi ya lingomba ya Nzambe, mpe bazali koloba ete likabo ya mosala ya Baefese 4:10-13 oyo Nzambe apesaki na lingomba elóngi te, yango wana bango bazwi esika na yango. Awa tozali mpenza na katikati ya kokokisama ya lisakoli, oyo babengaka botomboki ya Kola, mpe bayebi kutu te ete bakokisi yango. Ná bonzangi komona, bazali kokóba koteya makambo oyo babiki lokola solo. Tika ete Nzambe ayokela bango mawa. Tika ete miso na bango éfungwama liboso na ntango koleka. Oh, boyoka ngai. Ntango nini lokumu ya mosolo, bokambi ya bato, makoki ya kosala mombongo, to mayele ya bomoto epésaka moto makoki ya kozala motambwisi na molimo, to epésaka kilo na Liloba ya Nzambe? Mpe soki biloko ya mosuni to bizaleli ya bato bibandi, na lolenge moko to mosusu, kotalelama lokola nzela oyo Nzambe asalelaka, na esika ete ézala BOBELE Molimo Mosantu, wana tozali kobundisa Nzambe, kasi mpo na Ye te.

Sikawa nalingi likambo oyo ékangama na bande kaka awa. Nazali koloba te kotelemela bampaka kati na losambo. Bongo te. Mpe mpaka yango akoki kozala mobola lokola moto mosusu nyonso oyo azalá mobola, to kozala moto oyo aleki na bozwi na mokili, na ntango nyonso oyo azali mpaka na motema mpe na misala. Nakotatabana te kopona moto nyonso oyo azali mpenza na makoki ya solo ya Molimo lokola mpaka to mosungi, ázala to te na mbongo mingi to na lokumu mingi kati na bato. Kasi ntango omoni lolenge moko ya kotambwisa makambo ya bato to makambo ya misolo, oyo ezali kokabola bato na lolenge moko to mosusu ekoti na kati na losambo, yango euti na Nzambe te. Yango ezali elembo mosusu ya ntango oyo tozali kobika na yango, Eleko ya Laodikia oyo ezali na bozwi mingi kati na nzoto, kasi mobola na Molimo.

"Nayebi bobola na yo." Bino bomoni ete bobola na bango ézali na boyokani ná eyanganelo ya Satana, kati na verse moko wana? Ya solo, ezali ebongiseli mozwi mpe ya nguya oyo ezali na bozwi nyonso mpe ezali ntango nyonso kopusa libanda bato ya bopolo oyo bazali kosalela Nzambe. Ntango Molimo ya Nzambe ezali kotambola na mitema ya bato, nani asundolaka bandako mpe biloko? Etongá moke ebungisaka ntango nyonso mpo na litomba ya bibongiseli minene. Bongo na nsima bato bakendeke wapi? Bazali kosambela na bandako, na bandako ya kala ya kobomba biloko mpe na bandako ya nse ya mabelé, kaka ndenge bazalaki kosala ntango bazalaki kokende na mabulu ya kobomba bibembe.

Bato oyo bazalaki babóla na biloko ya mokili oyo. Ya solo. Kasi bazalaki bazui kati na Molimo.

"Nayebi kotuka na bango." Sikawa, likanisi ezali te ete bakosi wana bazali kotuka Nzambe, atako ezali komonana polele ete bazali kosala yango. Kasi bazali kotuka lingomba ya solo. Ezalaka ntango nyonso bongo. Na ebandeli, Bayuda ya Yelusaleme batukaki lingomba. Bapagano oyo bazalaki kosambela banzambe ebele basalaki mpe bongo. Soki bakoloba mabe ya moto moko, ekozala ntango nyonso ya momboto ya solo. Na mikolo ya Néron, bazalaki kofunda baklisto mpo na makámá nyonso - ata mpo na kozikisama ya engumba ya Loma. Na mikili ya bakomuniste, etonga moke nde ezalaka ntango nyonso ya liboso oyo ebomamaka, atako na solo bazali moke mpenza. Atako baklisto bazali bato malamumu ya sembo, oyo basalaka bobele bolamu, bakonyokola bango ntango nyonso kino na nsuka mpo ete bábomama na nzoto.

Yango ezali bongo mpamba te bazali mpamelá mpo na bato oyo bazangi Nzambe. Na miso ya bato mabe, bazali lokola mpamela makasi. Mpe atako bayengebene bazali na mokáno ya kosala mabe te epai na bato mabe, kasi balingi bobele kosala malamumu, bazali ntango nyonso kokotisama na mikakatano lokola oyo Yoane Mobatizi akutanaki na yango liboso na Elode. Mpo ete Yoane alingaki kosala Elode to mwasi na ye mabe te, kasi alingaki nde kobikisa bango na nkanda ya Nzambe. Yango esosolamaki kaka mabe te mpe batelemelamaki yango kaka makasi te, kasi Yoane abomamaki mpo na yango. Mpe mpo na bolamu nyonso oyo bato ya Nzambe basalaka, bazali bobele koyokisama nsoni na miso ya bato nyonso mpe kobomama. Na ntembe te esengeli kozala na nguya moko ya mabe nsima na bato oyo bazangi lisosoli na lolenge ete bázongisa mabe na bato oyo basalaki bango malamumu. Ya solo, nguya yango ezali. Ezali Satana. Eyano ezali na verse oyo elandi.

## MIBU ZOMI YA MINYOKO

Emoniseli 2: 10

*"Kobanga te mpo na mpasi oyo ekoyela yo; talá, Zabolo akobwaka bato mosusu kati na bino na bolóko mpo ete bómekama, mpe bokozala na minyoko mikolo zomi. Zalá sembo kino liwa, mpe nakopesa yo motole ya bomoi."*

Mbala nyonso Nkolo asalelaka maloba oyo, "Bobánga te", ezali na lisengelí moko penepene oyo ekomema na likama monene, na mpasi mpe na kozanga. Sikawa Alobi te na mokuse mpe na lolenge ya polele ete: "Minyoko ezali koya". Yango elingaki komema kobanga. Kasi lokola mama oyo alingi koboma mwinda akoloba na mwana na ye na mongongo ya boboto mpe ya kokitisa motema ete: "Sikoyo kobanga te, mpo mwinda elingi kokufa mpe ekozala molili. Kasi kobosana te ete nazali awa elongo na yo." Bongo Azali koloba: "Kobanga moto te to oyo akoki kosala yo. Ngai nazali elongo na yo, mpe ngolu na Ngai ekoki mpo na yo. Ntango okoleka na mai, ekozindisa yo te. Ata na kati ya liwa, okolongama te. Bazali koleka balongi."

Ntoma monene, Polo, ayebaki uta na makambo oyo akutanaki na yango bosolo ya maloba wana mpe akomaki na Baloma 8:35-39,

*"Nani akokabola biso na bolingo na Klisto? minyoko, to mpasi, to bolózi, to nzala, to bolumbu, to likamá, to mopangá?"*

*Kolanda ndenge ekomámá: "Mpo na Yo, tozali kobomama mokolo mobimba, tokotángami lokola bampate mpo na kobomama"*.

*Kasi kati na makambo oyo nyonso, tozali koleka balongi na nzela na Ye Oyo alingaki biso.*

*Mpamba te nandimi solo ete ézala liwa to bomoi, baanzelu to milimo mabe, makambo ya mikolo oyo to makambo oyo ekoya,*

*To bosanda, to bozindo, to ekelamo mosusu nyonso, ekoki te kokabola biso na bolingo ya Nzambe oyo ezali kati na Klisto Yesu Nkolo na biso.*

Te, tosengeli kobanga te. Bolingo na Ye ezali kolongola kobanga nyonso.

Sikawa botala malamumu oyo Ye alobi : "zabolo akobwaka basusu kati na bino na boloko mpo ete bómekama." Bayuda bazalaki kosala bongo na ntango wana. Banganga-nzambe ya bapakano bazalaki kosala bongo na ntango wana. Lokola bato bazalaki kolinga libándá ya masano, mpo na kosepelisa bango, bayángeli ya mboka bazalaki kobwaka nkóto na nkóto ya baklisto na liwa epai na bankosi mpe na bilombe oyo bazalaki kobunda na mipanga mpo ete bábomama. Zabolo azali na boyokani nini na likambo yango? Mpo na nini kopesa ye foti? Ee, kasi ezali koyina ya Zabolo nde ezali na nsima ya makambo nyonso wana. Azali nsima na yango nyonso mpamba te ayinaka Nzambe. Eloko oyo Nzambe atye motema na Ye likolo na yango, na ntembe te Satana akoluka kobebisa yango. Kasi botala malamumu. Mwa kongengisama mosusu yango oyo. Soki Satana azali nsima na Bayuda oyo bazali komema Baklisto na bisambiselo, boye Bayuda bazali na lingomba ya Nzambe te, kasi ya zabolo. Koyangana na bango mpe ezali eyanganelo ya Satana. Mpe soki Lingomba Katoliko ya Loma ebomaki ebele ya bandimi kati na Bileko ya Molili, solo, mpe kati na bileko nyonso, boye bango mpe bazali ya zabolo, mpe bazali bato ya Satana.

Mpe soki bokanisi ete ezali kobulunganisa, bozela kaka kino lisakoli ya Emoniseli 13 ékokisama. Ezali mpenza solo ete États-Unis ya Amerika ezali kati na mokapo yango. Motángo zomi na misato yango moko ezali elembo ya ekólo yango. Ebandaki na bitúká zomi na misato. Bendéle na yango, ezali na minzoto zomi na misato mpe mikolóto zomi na misato. Mpe atandelé na ye ezali awa, na mokapo zomi na misato. Na elilingi oyo elobelami na mokapo oyo ekozama mabe nyonso ya nyama oyo ezalaki liboso na yango. Lokola nyama ebimaki na Likita monene ya Nicée, ndenge moko mpe elilingi ekobima na Likita ya Mangomba ya Mokili mobimba na nguya nyonso ya mabe mpe ya Satana mpo na kobimisa nkanda ya Zabolo likoló na nzete ya vinyo ya solo ya Nzambe. Ekozala bongo kozongelama ya mayele mabe mpe ya mabe nyonso ya Satana.

Baoyo bazali kobundisa bato ya komikitisa ya Nzambe mpe bazali kotyola mpe kobebisa; tiká ete básala yango. Mpe bakosala yango. Mpe nyonso wana na Nkombo ya Nzambe mpe ya makambo ya kosambela. Kasi bazali kokósa. Bazali bato ya Nzambe te. Bazali baoyo ya tata na bango, zabolo. Bango, na misala na bango bazali kotelemela moto NYONSO, bazali mpenza komonisa polele oyo bazali. Tiká bango básala ebongiseli mpe báboya etóngá oyo moke. Bazali bobele komonisa epai na bato nyonso ete bazali bato ya Satana. Bazali mowiti ya lokuta, mowiti oyo ebomaka. Koyina na bango etalisi polele oyo bango bazali. Bazali nde lingomba ya batemeli ya Klisto, ya Banikolaiti.

*"Bakobwakama na boloko."* Ee, bamemamaki na bisambiselo, bafundamaki na efundeli ya lokuta, basambisamaki, mpe batyamaki na bolóko. Mpe ya solo, nyonso wana ezali kosalema na nkombo ya makambo ya kosambela, ya bizaleli malamumu mpe ya kozanga komona mabe na yango. Nyonso esalemi mpo na mokano moko ya malamumu Yango esali ete nákanisa ekateli ya Esambiselo Monene na oyo etali kobondela mpe kotángá Biblia na biteyelo. Nani azali nsima na yango? Ezali Satana. Ezali bobele kopela ya nkanda mosusu mpo na kotelemela Nzambe.

"Bokozala na minyoko mikolo zomi." Yango ezali lisakoli. Mpe ezali na nzela na yango nde tokoki koyeba boumeli ya Eleko na Sumuluna. Dioclétien, mokonzi oyo alekaki mabe kati na bakonzi nyonso ya Loma, abandisaki minyoko moko ya nsómo mpo na kotelemela basantu ya Nzambe, oyo soki ézalaka mawa ya Nzambe te, mbele ebomaki bandimi nyonso. Ezalaki minyoko oyo esopaki makila mingi koleka na lisoló ya bato, mpe eumelaki mibu zomi (mikolo zomi oyo Emoniseli 2:10b elobeli) kobanda na mobu 302 kino na mobu 312.

*"Zalá sembo kino na liwa."* Alobi te zalá sembo "kino liwa na yo", kasi "kino na liwa." Ekoki kozala ete okosengela kokanga litatoli na yo na makila na yo. Bankóto ya bato, ata bamilió ya bato, basilá kokufa kati na bileko nyonso. Bakufaki kati na kondima. Lokola Antipa, motatoli ya sembo, bazwaki bomoi na bango na motuya te kino na liwa. Mbala mingi tokanisaka ete ekoki kosalema te mpo na moto kozala martíru. Kasi bokanisa ete kondima oyo tosalelaka mikolo nyonso mpo na kolonga kati na Klisto Yesu, ezali kondima moko oyo esungaki Polycarpe mpe bamartíru nyonso. Kondima oyo eleki likolo ekopesa ngolu oyo eleki likolo mpo na ngonga oyo eleki likolo. Nzambe ákumama mpo na libela!

*"Mpe Nakopesa yo motole ya bomoi."* Lokola ata kópo ya mai ya mpio oyo epesami na nkombo ya Nkolo ekozanga te kozwa mbano, mbano ekozala monene mpenza mpo na ye oyo apesi bomoi na ye lokola martiru mpo na nkombo ya Nkolo Yesu. Ntango mosusu tokoki kozwa mwa likanisi moko soki tokokanisi motole oyo na motole oyo moto azwaka soki alongi na momékano ya mbangu

Na Bakolinti 9: 24, Polo alobi :

*"Boyebi te ete baoyo bakokima mbangu kati na momékano, bakopota mbangu bango nyonso nde moko akozwa libonza? Bókima mbangu ete bózwa libonza."*

Moto oyo azalaki kolonga na momekano ya mbangu ya olympique azalaki kozwa motole oyo esalemi na bitape ya nzete ya olive. Kasi motole oyo elobelami awa na Emoniseli, oyo epesami na moto oyo akufi mpo na kondima na ye, ezali motole ya bokonzi. Yesu abengi yango motole ya bomoi. Motole moko ezali mpo na baoyo babundaki, mpe mosusu ezali mpo na baoyo bapesaki. Mitole nyonso mibale ebebaka te. Ekokufa te. Etikali moke, balongi ya momekano ya mbangu mpo na bomoi ya mokili, bakobungisa esengo ya masanzoli ya mokili. Nkembo na bango ekoleka. Kasi baoyo bazali kopesa bomoi na bango mpo na Nzambe, ézala na kobundáká mokolo na mokolo to na kosopáká makila na bango lokola mbeka ya nsuka ya bomoi na bango, bakozwa motole ya bomoi.

Tolekisaka ntango mingi te na kosaláká makasi mpo na mbano ya seko ya Nzambe. Mbano ya Nzambe ezamaka na pepele mingi. Soki tondimi bosolo ya lisekwa ya nzoto, mpe na bokonzi ya seko oyo ezali solo, boye tosengeli kobomba na likoló biloko wana ya motuya oyo bizali mpo na basantu ya sembo.

### **MBANO MPO NA KOLONGA**

Emoniseli 2:11,

*"Ye oyo azali na matoyi, áyoka makambo oyo Molimo alobi na mangomba. Ye oyo akolonga, akoyoka mpasi ya liwa ya mibale te."*

Sikawa, mbala moko lisusu Molimo azali koloba na bileko nyonso. Nsango oyo ezali mpo na kobóndisa biso lelo, lokola ebóndisaki bandeko na biso ya bileko mosusu nyonso. Mpe Alobi na biso ete liwa ya mibale ekosimba biso te.

Biso nyonso toyebi ete liwa ya mibale ezali libeke na móto.

Emoniseli 20: 14,

*"Mpe liwa ná lifelo ebwakamaki kati na libeke na móto. Yango ezali liwa ya mibale."*

Ya solo, yango elingi koloba ete baoyo nyonso bazalaki kati na yango, babwakamaki na libeke ya móto. Na bongo, nalingi kobimisa likambo moko awa mpo na bino. Na ntembe te yango ekosala ete bato bálobela mateya na ngai ya kokamwa.

Kasi natelemi awa na nguya ya Liloba ya Nzambe mpe nandimaka te ete mozangi kondima akendaka na lifelo ya seko mpe akozika kuna libela na libela. Ya liboso, lifelo, to libeke na móto,, to nyonso bolingi kobenga yango, ezali ya seko te. Ndenge nini ekoki kozala ya seko soki ezali na ebandeli? Na Matai 25: 11, elobi ete *"móto ya libela ebongisamaki mpo na zabolo ná banje na ye."* Sikawa soki ebongisamaki, na bongo ezangaki ebandeli te. Soki ezalaki na ebandeli, boye ekoki kozala ya Seko te. Ya solo, okoki kobeta libaku na ndimbola ya liloba "libela." Kasi liloba yango elingi koloba "uta bileko na bileko" mpe ezali na bandimbola ekeseni. Na kati na1 Samwele 3.13-14, Nzambe alobaki na Samwele ete Akosambisa ndako ya Eli mpo na libela, mpe "mpo na libela" bakopesa lisusu mbeka te lokola banganga-nzambe na Ye. Mpe na 1 Mikonzi 2:27, Salomo alongolaki bakitani ya nsuka ya Eli na mosala ya bonganganzambe. Yango esalemaki nsima ya mabota minei to koleka. Na bongo, bokoki komona ete "libela na libela" ekokani te na oyo ezali "seko", to oyo ezali na ebandeli te mpe nsuka te. Awa, na ndakisa oyo, liloba "libela" elingi koloba "kino na kolimwa" Yango nde esalemaki. Balimwaki.

Botala liloba oyo, "libebi", na 2 Batesaloniki 1: 9,

*"Bakozwa etumbu ya libebi ya seko."*

Na lokóta ya Greki: "libebi" elingi koloba kobomama nyee. Mpe liloba oyo, "libebi" elingi TE koloba "kobebisa". Sikawa "kobebisa" elingi koloba eloko moko oyo ezali kobeba se kobeba. Bongo, kobomama nyee mpo na libela elingi koloba nini? Yango elingi te koloba koboma nyee ntango nyonso, wana elingaki kozala liloba "kobebisa" na esika ya "libebi." Elingi koloba koboma kino na kosilisa nyee. Kosukisa yango.

Bokoki komituna sikawa, ntango nini bokoki kosalela liloba wana, " seko", mpe kosalela yango na lolenge totayamaki te. Ezali pete. Ntango esalelami mpo na Nzambe, elingi koloba kozanga ebandeli mpe nsuka, koutela libela na libela mpe kozanga nsuka. Mpe ntango ozali koloba na ntina na bomoi ya seko, ozali kokanisa na bomoi ya Nzambe. "Mpe litatoli yango ezali ete; Nzambe apesi biso bomoi ya seko, mpe bomoi yango ezali kati na Mwana. Ye oyo azali na Mwana azali na bomoi." Na yango, bobele bana ya Nzambe nde bazali na bomoi ya seko, lolenge ya bomoi oyo ezali na ebandeli te, kasi oyo ezalaka ntango nyonso. Ezali solo. Ozali sikawa na eloko moko ya seko kati na yo — oyo ezali na ebandeli te mpe na nsuka te. Ezali Molimo ya Nzambe. Ezali eteni ya Nzambe Ye moko. Ezali bomoi ya Nzambe.

Nzokande, soki mosumuki akokende na lifelo mpe akonyokwama kaka lokola yo okokende na likoló mpe okosepela na likoló, wana azali na lolenge moko ya bomoi oyo yo ozali na yango.

Lisusu ezali na baoyo balobaka ete bomoi ya seko elingi koloba bolamu ya bana na Nzambe. Ezali bolamu mpe esengo na bango nde ezali na likámá. Na ngambo mosusu, mosumuki akendaka na etumbu na ye, na yango tokoki kokitisa liwa ya mibale na likambo ya etumbu mpe ya esika ya kokende. Bomoi ya Seko elingi koloba lola, mpe etúmbu ya seko elingi koloba lifelo. Bokokamwa na komona bato oyo bakumisami lokola bato ya teoloji oyo bandimaki likambo yango. Kasi boyebi soki yango esalaka nini? Ekomisi bomoi na seko likambo ya esika moko boye, na esika ete ézala Moto. Bomoi ya Seko ezali Nzambe - Nkolo Yesu Klisto. Ndenge nini moto akoki kondima likambo ya ndenge wana, ete bomoi ya seko etaleli esika moko boye, yango ezali kolekela ngai. Soki nakanisi yango, ezali kokamwisa ngai.

te, mbuta muntu. Ezali bobele na lolenge moko ya bomoi na seko. Nzambe azali na yango. Soki tozali na Nzambe, tozali na bomoi na seko kati na Ye mpe na nzela na Ye.

Na yango bomoni, liloba wana seko na seko, to libela, ekoki kosalelama na ndenge mingi, kasi yango ezali na ndimbola bobele moko ntango ezali kolobela Nzambe, mpamba te Nzambe Azali oyo Azali. Ezali boumeli ya Nzambe. Na ndimbola wana, okoki kosalela yango na eloko mosusu te. Bobele Nzambe nde azali seko na seko, mpe lokola Azali na bomoi, biso mpe tozali na bomoi elongo na Ye.

Sikawa botika te moto moko áloba ete ngai nandimaka te ete libeke ya móto mpe etumbu ezali. Nandimaka yango. Nayebi te soki ekoumela ntango boni, kasi nsukansuka ekolongolama. Na Emoniseli 21:8, elobami ete basumuki oyo balobelami awa bakozwa eteni na bango kati na libeke ya móto. Kasi ndimbola ya solo ya liloba yango ezali te "eteni" kasi ezali nde "ntango." Bomoni, ezali nde bongo.

Na bongo, bato mabe bakobwakama na lifelo (Hadesi to lilita), mpe lifelo ekobwakama na libeke na móto. Bakabwání na Nzambe. Yango ekozala likambo ya nsómo mpenza.

Kasi ekozala bongo te mpo na bayengebene. Bango basengeli te kobanga. Basilaki kosikolama na Nzambe. Bazali kati na ntolo na Ye. Bazali balóngi. Bongo moto oyo alongi azali nani? Ye oyo andimi ete Yesu azali Klisto.

Mpo na nini molóngi oyo, mondimi oyo akobikisama na yango, mpe akokóta na mokili ya bomoi ya seko mpe ya bisengo? Mpamba te Yesu afutaki motuya mpo na kosikola biso na masumu. Akangisaki lidusu oyo ezalaki kokabola biso, mpe biso baoyo tozalaki mosika, tozongisami sikawa pene na nzela ya makila.

Mpe bakokwea na etumbu soko moke te. Bakokóta ata moke te na libeke wana ya móto. Bakoki soko moke te kobunga mpo Akobungisa moko te na bango. Moto moko te kati na basikolami akozala esika mosusu longola bobele esika Yesu azali.

Boyebi mpo na nini ezali bongo? Nakotalisa bino yango na elilingi. Nazali na mwana mobali moko ya moke, Yosefe. Azali eteni na ngai, ata soki nini esalemi. Soki nazalaki mozwi, likambo ya mabe koleka nakokaki kosala elingaki kozala ya kolongola ye libula, kasi ezali na eloko moko te nakoki kosala mpo na kowangana ye. Napoki kosala yango te mpo azali eteni na ngai. Malamu, tika totálisa makila. Tiká tokokanisa makila na ye na oyo ya ngai. Ekotalisa ete Yosefe azali mwana na ngai. Azali ya ngai.

Ezali ekizame ya makila nde ekotalisa soki ozali ya Nzambe to te.

Nakoki te komipekisa kokanisa ntango nazalaki kobatela etonga ya bibwele Herefords, ya makila ya péto, kuna na etúká ya Colorado. Tosengelaki komema bangombe yango epayi ya bayangeli ya leta mpo ete batála bango, soki tolingi ete bália na esika ya leta ya koleisa bibwele ya bato nyonso. Kasi bazalaki kondima ata nyama moko te oyo azangaki elembo ya makila na litoi na ye. Elembo yango ezalaki komonisa ete nyama yango ezalaki oyo ya makila ya péto. Babateli ya bibwele oyo bazalaki kotala bango, bazalaki kotya likebi na nkómbó oyo ekomamaki wana te. Bazalaki bobele kotala elembo mpo na komona ete makila yango ezalaki makila oyo ebongi. Aleluya! Soki ezali makila oyo ebongi, esengeli kozala ya malamumu.

Boyebi Nzambe atalaki nse mpe Alobaki: "Bomoto na kati oyo esali lisumu, yango ekokufa. Ekabwani na Ngai. Ekoki kobelemu na Ngai te. " Toyebi ete bato banso basali masumu mpe bazangi nkembo ya Nzambe Yango elingi koloba ete bango nyonso bakufi, bakabwani, mpe mokolo moko ata mwa bomoi wana ya moke ekolimwa mpe makambo nyonso makosila. Kasi Nzambe, na bolingo na Ye, azwaki nyama mpe azwaki bomoi ya nyama yango na esika ya bomoi ya mosumuki.

Na Kondimana na Kala, mosumuki azalaki komema mwana na mpate. Azalaki kotya lobóko na ye likoló ya mwana ya mpate wana nganganzambe azalaki kokata yango nkingo. Azalaki komona ndenge makila ezalaki kobima mpe koyoka ye kolela. Amonaki ndenge nzoto na ye ekómaki makasi na liwa. Amonaki milinga ya makila oyo esopanaki komata epai ya Nzambe. Ayebaki ete mwana na mpate akamataki esika na ye. Ayebaki ete bomoi ya mwana na mpate epesamaki na esika ya bomoi na ye. Kasi bomoi ya mwana na mpate wana ezalaki bomoi ya nyama mpe ekokaki te kozonga likolo ya mosumuki mpe kopétola ye. Na yango, alongwaki ná mposa moko wana ya kosala masumu. Azalaki kobima ná lisumu na makanisi na ye, mpe kozonga mpe kopesa mbeka mpo na likambo yango kaka na mbula oyo elandaki.

Kasi na Kondimana na Sika ezali bongo te. Mwana na Mpate na biso Oyo azali kokufa azali Mwana na Nzambe Oyo apesaki makila na ye lokola lisiko mpo na bato mingi. Na kondima, tozali kopusana mpe tozali kotya maboko na biso likolo na Mwana na Mpate wana — tomoni Ye, ná bampota oyo ezali kotanga makila, mokongo oyo ezokisami, nzube mabe oyo ezali kopasola elongi na Ye—toyoki mpasi na Ye mpe toyoki Ye kolela, “Nzambe na ngai, Nzambe na Ngai, mpo na nini Otiki Ngai?” Bongo likambo nini esalemaki? Bomo oyo ebimaki na makila wana oyo esopanaki, ezongaki likolo na ye oyo abongoli motema. Bomo oyo ezalaki kati na Ye ezongaki likolo na biso. Tozali lisusu na mposa ya kosala masumu te, mpe tozali sikawa koyina misala mpe bamposa ya nzoto.

Bótala biso. Bomo oyo ezali nini? Kaka mwa selile moko oyo eutaki na tata na biso. Mwasi apesaka makila te. Ye nde abimisaka likei; azali masini ya molunge oyo ebombaka mwana. Kasi makila eutaka na mobali. Yango wana mwasi azwaka nkombo ya mobali na ye. Bana bazuaka nkombo na ye. Mama azali ebombelo ya bana oyo abotelaka mobali.

Yango nde likambo esalemaki mpo na lisiko na biso. Molimo Mosantu ekitaki likolo na Malia, bongo ye abotaki Mwana Mobali mpe apesaki Ye nkombo Yesu. Mokeli monene akitaki mpe Akómaki mbeka mpo na masumu na biso. Makila na Ye ezalaki makila ya Nzambe. Ezalaki mpenza bongo. Makila wana ya Nzambe esopamaki mpe Molimo etikaki Ye ntango Akufaki na mpasi makasi. Na nsima BOMOI MOKO (MOLIMO) wana ezongaki mpo na kofanda kati na mosumuki oyo abongoli motema mpe epesaki ye bonsomi. Mosumuki wana azalaki lisusu kozonga mobu nsima na mobu te, kopesa mbeka nsima na mbeka te, mpo ezalaki lisusu na ntina te. Na nzela ya mbeka MOKO, asikolamaki mbala moko mpo na libela na bokonzi ya masumu, mpe azwaki bomoi ya Klisto oyo na nzela na yango azali koyangela na elongá likolo ya masumu, mokili, nzoto mpe zabolo.

Nzambe nde asalaki yango. Asalaki yango nyonso. Agangaki na mokili oyo elakelami mabe na masumu ete: “Nakopesa bino elembo moko. Moseka akokumba zemi. Moseka akokumba zemi, mpe akobota Mwana mobali. Yango nde ekozala elembo mpo na bino. Ekozala elembo ya seko. Mwana oyo ye akobota akozala Emanuele, Nzambe elongo na biso.”

Nzambe akitaki na kati ya makila, na nzela ya mobali te, kasi na nzela na Molimo Mosantu, mpe na kati ya libumu wana ya moseka hema etongamaki mpo na kokufa. Mombóto ya mwasi eyaki na ntina ete Ye azokisama mpo na komemela biso lobiko. Ntango Molimo Mosantu ayaki likolo ya Malia, Akelaki na kati na libumu na ye enama moke oyo elingaki koyikana mpe kokóma nzoto ya Nkolo na biso. Selile yango ekelamaki. Ezalaki Ebandeli ya Bozalisi ya Nzambe. Yango nde Nani Yesu azali. Mpe Mosantu wana atondisamaki na makila Mosantu, kutu makila ya Nzambe. Mongombo yango ebotámaki. Akolaki mpe akómaki mobali. Akendeki na ebale Yaladene mpe kuna, Mbeka yango esukolamaki na Yoane na ebale oyo ebéngami Yaladene. Ntango Mbeka yango oyo endimamaki na Nzambe ebimaki na mayi, Nzambe ayaki kofanda kati na Ye mpe Atondisaki Ye na Molimo kozanga ndelo. Mpe ntango Akufaki mpe Asopaki makila na Ye, bomoi oyo ebongi be ya Nzambe ebimisamaki mpo na kozonga likolo ya mosumuki oyo akondima Klisto lokola Mobikisi na ye.

Oh, ezali mpenza kokamwisa. Yehova, Mwana oyo abotamaki azalaki kolela likolo ya liboke ya bosoto. Yehova abotamaki kati na elyelo ya bibwele. Yango nde elembo na bino ya seko mpo na bato ya lolendo, baoyo bavimbi na lofundu, bato ya mayele ya lokuta oyo basili kokolisa mateya na bango moko ya teoloji mpe baboyi bosolo ya Nzambe. Yehova Nzambe, mwana moke koleláká na ndako ya bibwele oyo ezali na nsolo mabe Mpe biso tokanisaka ete tozali na lotomo ya kozala na lolendo, kotombola zólo na biso, koloba mabe mpe kosala makambo lokola nde tozali bato minene. Talá elembo ya solosolo. Oyo nde ezali ya malamumu. Yehova, kosakanáká lokola mwana mobali moke. Yehova kosaláká mosala ya mabaya. Yehova kosukoláká makolo ya balóbi-mbisi.

“Nakopesa bino elembo,” elobaki Nzambe. “Ezali te elembo ya nganga-nzambe oyo alati elamba ya nkingo mpembe. Ezali elembo ya bozwi mpe ya nguyu te. Elembo oyo ezali na eloko moko te kati na yango oyo okolinga, to oyo okokanisa ete ebongi. Kasi ezali elembo ya seko. Ezali elembo monene koleka nyonso. ” Yehova atelemaki wana na lopango, Azokisamaki mpe Azalaki kotanga makila, ná nzube mpe nsoi na elongi na Ye, Asekámaki mpe Atalámaki mpamba. Yehova atyolamaki mpe aboyamaki, abakamaki bolumbu likoló na ekulusu, wana bakosi bazalaki kowolola Ye mpe kotemela Ye ete akita na ekulusu. Yehova azalaki kokufa. Yehova azali kobondela kasi eloko moko te ezalaki kosalema.. Na nsima Yehova akufaki. Yango nde elembo mpo na bato nyonso sikawa. Ezali na mosusu te oyo ekokani na yango. Ezali oyo ya monene koleka.

Na nsima molili ezipaki mokili. Batyaki Ye kati na nkunda. Afandaki kuna mikolo misato mpe butu misato kino koningana ya mabelé epanzaki molili tuu ya butu mpe Ye Abimaki. Yehova abimaki. Yehova amataki na likoló. Na nsima Yehova azongaki mpo na kofanda kati na lingomba na Ye. Yehova azongaki na mopepe makasi mpe na ndemo na móto. Yehova azongaki mpo na kotambola na katikati ya lingomba na Ye mpe kopesa bato na Ye nguyu. Yehova ayaki lisusu, kasi na mbala oyo mpo na kofanda kati na libota na Ye. Mpe lisusu, Yehova azali kobikisa babeli, kosekwisa bakufi mpe komimonisa na nzela ya molimo. Yehova azongaki lisusu, Azalaki koloba minoko ya sika, mpe koyanola yango na nzela ya ndimbola.



Yehova akitaki mpe atombolaki mwasi na pite mpo ete asúmuka lisusu te. Akendeki epai ya molangwi masanga, ná elongi ebébá na bampóta, wana alalaki na kozanga koyeba na kati ya terasé. Iyo, Yehova ayaki mpo na komimonisa kati na nzoto mpe na nzela ya nzoto. Yehova ayaki —Nzambe kati na biso, elikia ya nkembo.

Iyo, Yesu ayaki, Asopaki makila na Ye mpe Akangolaki bakangami. Ayaki mpe asikolaki mpate na Ye oyo babungaki. Apesaki bango bomoi ya Seko mpe bakokufa soko moke te. Akobungisa ata moko te na bango, kasi Akosekwisa bango na mokolo ya nsuka.

Aleluya, kufa ya mibale ekoki kobeta bango te. Ezali na nguya likolo na bango te. Mpamba te bazali ya Mwana na Mpate mpe balandaka Ye, bisika nyonso Azali kokende.

### **MOLIMO MOSANTU NA BILEKO NYONSO**

Emoniseli 2: 11,

*"Ye oyo azali na litoi, áyoka oyo Molimo alobi na mangomba."*

Ezali na eleko moko te ya lingomba epai wapi molongo oyo elobelami te. Eleko na eleko ezali kozwa likebisi motindo moko mpo na bato ya bileko nyonso. "Ye oyo azali na litoi, áyoka oyo Molimo alobi." Nzokande, ekoki mpenza kosalema te ete bato nyonso báyoka likambo oyo Molimo azali koloba na bileko bikeseni.

Bakolinti 2:6-16,

*"Nzokande, toteyaka bwanya kati na bato oyo bakomeli, kasi bwanya ya mokili oyo te, to ya bankumu ya mokili oyo te, oyo babongisami mpo na libebi;*

*Kasi toteyaka bwanya ya Nzambe na libombami, kutu bwanya oyo ebombami, oyo Nzambe abongisaki liboso na ntango mpo na nkembo na biso:*

*Oyo moko te kati na bakonzi ya mokili oyo ayebaki, mpo soki bayebaki yango, balingaki te kobáka Nkolo ya nkembo na ekulusu.*

*Kasi, kolanda ndenge ekomama, Oyo liso etikala komona te, oyo litoi etikála koyoka te, oyo ekotá na motema na moto te, yango nde Nzambe abongisi mpo na baoyo balingaka ye.*

*Kasi Nzambe amonisi biso yango na nzela ya Molimo na Ye: mpamba te Molimo ayebaka makambo nyonso, ata makambo ya bozindo ya Nzambe.*

*Mpo nani kati na bato ayebi makambo ya moto, longola se molimo ya moto oyo ezali kati na ye? Ndenge moko mpe moko te ayebi makambo ya Nzambe, longola kaka Molimo na Nzambe.*

*Nzokande biso tozwaki molimo ya mokili te, kasi Molimo oyo euti na Nzambe, mpo tókoka koyeba makambo oyo Nzambe apesi biso na nzela ya ngolu na Ye.*

*Tozali mpe koloba makambo yango na maloba ya bwanya bomoto te, kasi na maloba oyo eteyami na Molimo Mosantu; kosalela elobeli ya Molimo mpo na makambo ya Molimo.*

*Kasi moto ya mosuni ayambaka makambo ya Molimo ya Nzambe te, mpo ete ezali bolema epai na ye; akoki mpe koyeba yango te, mpo ete ekoki kososolama bobele na nzela ya Molimo.*

*Moto ya Molimo asosolaka makambo nyonso, kasi ye moko asosolamaka na moto te.*

*Mpo na nani ayebi makanisi ya Nkolo, mpo ákoka kolakisa Ye? Kasi biso tozali na makanisi ya Klisto. "*

Matai 13: 13-16,

*"Yango wana Nazali koloba na bango na masese : mpo ete atako bazali kotala, bámona te; mpe atako bazali koyoka, báyoka te; basosola mpe te.*

*Mpe na kati na bango lisakoli ya Yisaya ekokisami, oyo elobi ete : Bokoyóka na matoyi na bino, kasi bokososola te; bokotála na miso na bino kasi bokomona te;*

*Mpamba te mitema ya bato oyo ekomi libanga, bazipi matoyi mpe bakangi miso na bango; na kobanga ete miso na bango emona, matoyi na bango eyoka, mitema na bango esosola, babongola mitema mpe Ngai nabikisa bango.*

*Kasi esengo na miso na bino mpamba te ezali komona, mpe na matoi na bino mpamba*

*te ezali koyoka."*

Yoane 8:42 -44,

*"Yesu alobaki na bango ete, soki Nzambe azalaki Tata na bino, bolingaki kolinga Ngai; mpamba te nauti epai ya Nzambe mpe nazali awa mpo na mokano na Ye. Nayaki na ndenge na Ngai moko te, kasi Ye nde atindaki Ngai.*

*Mpo na nini bozali kososola elobeli na Ngai te? Ezali mpo ete bokoki koyoka Liloba na Ngai te.*

*Bino bouti na tata na bino Zábolo, mpe bokokokisa bamposa ya tata na bino. Ye azalaki mobomi longwa na ebandeli, mpe afandaka kati na solo te, mpo ete solo ezali kati na ye te. Wana ezali ye koloba lokuta, azali koloba na motindo na ye mpenza, mpamba te azali mokosi mpe tata ya lokuta."*

Emonani mpenza polele na Makomi oyo ete moto moko te akoki koyoka Nzambe na ye moko. Likoki wana esengeli kopesamela ye na Nzambe.

Matai 16:17,

*"Yesu ayanolaki mpe alobaki na ye ete: "Opambolami, Simona mwana na Yona; mpo ete mosuni mpe makila emonisi yo yango te, kasi Tata na Ngai Oyo azali na likoló."*

Na kosangisáká milongo oyo esika moko tomoni ete ezali bobele na etuluku moko ya bato, etuluku ya bato ya lolenge moko boye oyo bazali na makoki ya koyoka eloko Molimo alobi na eleko moko na moko. Ezali etonga moko ya ndenge mosusu oyo ezali kozwa emoniseli mpo na eleko moko na moko. Etuluku yango ezali ya Nzambe, mpo ete etutluku oyo ekoki koyoka te ezali ya Nzambe te. (Yoane 8:42 -44.) Etuluku oyo ekoki mpe ezali koyoka makambo Molimo azali koloba mpe ezali kozwa emoniseli na yango ezali etuluku oyo elobelami na I Bakolinti 2:6-16. Bazali baoyo bazali na Molimo ya Nzambe. Bazali baoyo babotami na Nzambe. Babatisami kati na nzoto na Nkolo Yesu Klisto na nzela na Molimo na Ye. Babatisami na Molimo Mosantu.

Mpo na komonisa polele makambo oyo touti koloba, mpe lisusu kosalela Makomi oyo tosengeli kobosana te wana tozali koloba mpo na koyeba nani abatisami na Molimo Mosantu, tótala oyo Yesu alobaki na Yoane 6:45,

*"Ekomami kati na basakoli, Mpe bango nyonso bakoteyama na Nzambe."*

Kasi bófungola na Yisaya 54:13, esika yango ezamaki, mpe elobi ete :

*"Mpe bana na yo nyonso bakoteyama na Nkolo."*

Ba NYONSO ya Nzambe bazali BANA ya Nzambe. Na bongo, elembeteli ya kozala mwana ya solo ya Nzambe (ye oyo Molimo ekiti likoló na ye mpe efandi kati na ye) emonisami lisusu lokola moto oyo ateyami Liloba na Molimo Mosantu.

Sikawa bokoki kobanda komona mpo na nini minoko na sika ezali elembo ya kobatisama na Molimo Mosantu te. Na eleko moko te elobami ete, "Moto oyo azali na monoko ya sika áloba oyo Molimo azali koloba." Yango ezali kolongola minoko ya sika, ndimbola na yango, mpe bisakweli, mpe bongo na bongo, lokola bilembeteli. Elembeteli ezali KOYOKA oyo Molimo elobi. Molimo azali koloba. Iyo, Molimo azali koteya. Yango ezali mpenza oyo Yesu alobaki ete Akosala ntango Akoya.

Yoane 14: 26,

*"Akoteya bino makambo nyonso mpe Akozongisa na makanisi na bino makambo nyonso oyo Nayebisaki bino."*

Mpe yango mpenza nde esalemaki. Ezali bongo nde Nsango Malamu ekomamaki. Bato wana, na nzela ya Molimo Mosantu, bakanisaki Maloba mpenza oyo Yesu alobaki. Yango wana Nsango Malamu ezali na bosikisiki. Ezali ya kobonga be. Nzokande Molimo amemaki kaka te makambo nyonso na makanisi na bango kasi Ateyaki bango lisusu na ntina ya bosolo oyo basilaki kozala na yango. Na lolenge wana nde Polo azwaki bimoniseli na ye. Alobaki na ntina na yango,

*"Nazali koyebisa bino, bandeko, ete Nsango Malamu oyo esakolami na ngai euti na moto te.*

*Mpo nazwaki yango epai ya moto te, nateyamaki yango mpe (na moto) te; kasi nazwaki yango na nzela ya emoniseli ya Yesu Klisto."*

Bagalatia 1:11-12. Alakisamaki na Molimo Mosantu.

Mokolo moko, ntango Yesu azalaki awa na mabelé, moto moko ya lokumu ayaki kotala Ye. Mobali yango alobaki: "Labi, toyebi ete ozali molakisi oyo atindami na Nzambe." Kasi bokomona ete Yesu akataki ye na mokuse. Abalukaki epai na Nikodeme mpe maloba Ye alobaki ekoki kolimbolama boye, "Nazali molakisi TE. Nazali Mwana na Mpate ya Mbeka mpo na lisumu. Nazali kosala ete Mbotama ya Sika ézala likoki na nzela ya Molimo na Ngai. Kasi moto Moko akoya, Oyo Azali Molakisi. Ye azali Molimo Mosantu. " Ntango Yesu azalaki na mokili Ye, Ayaki lokola Mwana na mpate, mpe lokola Mosakoli. Kasi ntango azongaki likolo na lingomba na nzela ya Molimo na Ye, Akómaki Molakisi.

Mpe toyokaka bosolo moko na bileko nyonso "Ye oyo azali na litoi, áyoka makambo oyo Molimo alobi na mangomba." Kasi bobele moto oyo atondisami na Molimo nde akoki koyoka emoniseli mpo na eleko wana. Moto mosusu akoki te. Te, mbuta muntu. Bakoki te, mpo ezali mpenza oyo Polo alobaki kati na 1 Bakolinti ya 2:6-16.

Sikawa likambo oyo esengeli kopesa bino esengo. Ezali na liteya moko ya kokamwa oyo ezali kopalangana mpe ezali kobimisa kozanga koyokana mpe nkanda. Mpamba te ntango ba pentecôtistes balobi ete OSENGELI koloba na minoko ya sika; soki bongo te, ozwaki batisimo ya Molimo Mosantu te, bazali na bongo to kowangana ete bato minene lokola Knox, Moody, Taylor, Goforth ná basusu bazwaki Molimo Mosantu, to koloba ete bango nyonso bazalaki koloba minoko ya sika na kobombama mpe bayebaki te nini ezalaki koleka. Sikawa, yango ezali solo te. Te, mbuta muntu. Yango ezali libunga monene. Koloba minoko ya sika ezali te elembeteli oyo emonisi ete moto atondisami na Molimo. Ezali bobele moko na komonisama libwa oyo elobelami na 1 Bakolinti 12. Eteni moko te ya Makomi elobi ete moto alobaka na minoko ya sika ntango azwi Molimo Mosantu to ete azwi Molimo Mosantu ntango azali koloba na minoko ya sika. Kasi elobi ete "Nsima na bango nyonso kotondisama na Molimo Mosantu, balobaki na minoko ya sika," mpe na nsima elobi ete basakolaki.

Lelo bato mingi bandimaka ete bato nyonso oyo bazali koloba ete bazwi Molimo Mosantu na kolobáká minoko ya sika, bazali koloba monoko ya solo ya Molimo. Kasi ezali bongo te mpamba te bato mingi balobaka na nkótá oyo eyebani kasi na nsé ya bopusi ya molimo mabe. Sikawa, tika tóloba ete tozali kati na liyangani moko mpe bato nyonso bazali koloba minoko ya sika. Lolenge nini okoki koyeba oyo euti na Molimo mpe oyo euti na zabolo? Nazalaki kati na bapakano epai wapi banganga-nkisi bazalaki komela makila na mokuwa ya motó ya moto, bazalaki koloba minoko mosusu, kolimbola mpe kosakola. Bakoki ata kokoma na minoko ya sika.

Nzokande, soki koloba na nkótá ezali elembeteli to elembo ete moto azwi Molimo Mosantu, boye, koloba monoko ya sika nyonso esengeli kouta na Nzambe. Kasi bato oyo bazali kotombola koloba na minoko ya sika lokola elembo ya ebandeli, bandimaki ete ezali na minoko ya lokuta mpe ya solo, mpamba te Nzambe azali na oyo ya solo mpe Satana azali na oyo ya lokuta. Na yango, motuna na ngai yango oyo : "Nani ayebi oyo ezali solo? Nani asosolaki monoko yango mpo áyeba makambo oyo elobamaki? Nani azali na likabo ya bososoli mpo na koyeba?" Na biyano na mituna oyo tokoki kofandisa eloko moko, kasi liboso na yango, tosengeli komituna na ntina na eutelo ya koloba minoko ya sika. Bokoki komona malamumu sikawa ete soki opesi simbisi na likambo oyo ete minoko ya sika ezali elembo, kozanga ete ósósola eloko oyo elobamaki, osengeli na nsuka kondima ete koloba minoko na sika nyonso esengeli kozala ya Nzambe. Yango elingaki komema biso tóndima ete zabolo akoki te koloba minoko na sika. Ezali bongo te; te, ata moke te. Misionele nyonso ya solo oyo azali kosala na mboka mopaya ayebi malamumu mingi ete milimo mabe balobaka na minoko mosusu, lokola ngai nayebi yango na nzela ya makambo oyo nakutáná na yango.

Bato ya likindo ya Pantekote bandimaka ete bazali na Likomi moko te oyo ezali kolakisa ete bato balobaka na minoko mosusu ntango babatisami na Molimo Mosantu. Bandimi ete bazwaka yango na makambo oyo elobami na Mokanda ya Misala epai wapi mbala misato likoló na mitano, bato balobaki minoko ya sika. Mpe balobaka lisusu, kozanga ete báyeba Makomi , ete ezali na lolenge mibale ya minoko. Moko ezali lokota oyo ozali koloba wana ozali kozwa Molimo Mosantu mpe yango ezali "elembeteli ", nzokande na nsima soki ondimi, okoki kozwa likabo ya koloba na minoko mosusu oyo na nzela na yango okoki koloba mbala mingi.

Nzokande, balobaka ete moto akoki koloba na minoko mbala moko lokola elembo ya kozwa Molimo Mosantu, mpe koloba lisusu na minoko te nsima na yango. Mbala moko lisusu tozali na mposa makasi ya koyeba esika nini likambo oyo ezwami na Liloba. Soki ezali wana te, boye Nzambe alobaki yango te mpe mawa na ye oyo azali kobakisa na Liloba yango. Kasi ezali na eloko moko kati na Liloba na ntina na likambo oyo, mpe bango bazali mpenza kotya likebi na yango te. 1 Bakolinti 13. Elobeli minoko ya bato mpe ya baanzelu. Yango ezali minoko oyo eyebani mpe oyo eyebani te. Ba-Pantekotiste ya mikolo oyo balobaka ete bakoki kozwa Molimo Mosantu na kolobáká na minoko oyo eyebani te to minoko ya baanzelu. Bazali kotya pusu liboso na mpunda, mpamba te kati na Misala 2, Bato balobaki na monoko ya malamumu mpenza, oyo ata bazangi kondima bayokaki mpe basosolaki.

Sikawa, soki Nzambe afandi kimia, ekozala malamumu biso mpe tofanda kimia. Kasi esika Ye alobi, ekozala malamumu biso mpe tóloba, mpe tóloba oyo Ye asili koloba. Ayebisaki biso ete elembeteli, to eloko

oyo ekosalema nsima na kobatisama na Molimo Mosantu ezalaki ete Molakisi akoya mpe Akoteya biso bosolo nyonso. Kasi Molakisi yango azali molakisi ya KATI, molakisi ya libanda te. Soki Molimo azalaki na kati te, olingaki te koyoka bosolo mpe koyamba yango na nzela ya emoniseli ata soki ozalaki koyóka yango mokolo mobimba. Yango ezalaki elembo ete Molimo azalaki kofanda na kati na mikolo ya Polo. Baoyo batondisamaki na Molimo Mosantu bayokaki Liloba, bayambaki yango mpe babikaki na yango. Baoyo bazalaki na Molimo te bayokaki yango bobele lokola bato ya mosuni, batyaki ndimbola ya mabe likolo na yango mpe bakendeke kati na lisumu.

Na bileko nyonso, (mpe eleko moko na moko ezali eleko ya Molimo Mosantu mpo na mondimi ya solo) — nazali koloba, na bileko nyonso elembeteli ezalaki ndenge moko. Baoyo bazalaki na Molimo, Molakisi, bayokaki Liloba, mpe Molimo yango kati na bango Ezuaki Liloba mpe Eteyaki yango (Emonisaki bango yango); mpe bango bazalaki kati na etuluku ya baoyo bayokaki momemi-nsango ná nsango na ye, bazwaki yango mpe babikaki yango.

Nayebi ezali komekama monene mpo na kozongela kolobela mokolo ya Pantekote, mpe lisusu mokolo oyo Molimo Mosantu ekitaki na ndako ya Koloneyi, mpe na nsima kotya makambo wana mibale ya motindo moko lokola elembeteli ya libatizi ya Molimo Mosantu. Kasi, na mabaku nyonso mibale, bayoki bazalaki kososola minoko oyo elobamaki. Yango ekeseni mpenza mobulungano ya Babele ya mikolo oyo kati na makita ya Pantekote. Mpe soki yango ekoki te mpo na kondimisa biso ete tótika makanisi ya boye, tokosala nini tango tokutani na likambo oyo ete bato oyo batikálá koloba na minoko mosusu te bazali na ndambo ya bilembo mwambe oyo kati na bomoi na bango; lokola liloba ya bwanya, bososoli ya milimo, liloba ya boyebi, kondima, kobikisa bato, ata mpe makamwisi? Mpe likambo yango ezali na ntina mingi koleka mpamba te koloba na minoko mosusu ezali likabo ya moke koleka kati na makabo libwa; yango wana ntango tomoni bato oyo balobaka na minoko mosusu te, to batikala koloba minoko ya sika te, basalelaka makabo minene koleka baoyo balobaka na minoko mosusu, tosengeli kutu koleka liboso kolongola lokumu nyonso na mateya ya ndenge wana.

Na bongo bokoki komona sikawa, ete tozali na makoki te ya koloba makambo oyo Biblia elobi te. Ntango Makomi ezali koteya biso ete mosala ya Molimo Mosantu, mpe komonisama ya Moto wana oyo apambolami ezali ya komema bosolo ya eleko moko na moko epai ya momboto ya solo ya eleko wana, boye toyebi ete Molimo asengeli kofanda kati na moto to ye akoki te koyamba bosolo mpo na eleko yango. Amen. Ezali mpenza solo. Mpe soki bileko oyo ezali komonisa eloko moko, na ntembe te, ezali kobimisa mpe komonisa bosolo oyo.

Sikawa, yambo totika likambo oyo, nalingi koyebisa bino polele mpenza oyo Libatizi ya Molimo Mosantu ezali engebene na Liloba. Ezali engebene na ngai te, ezali mpe engebene na bino te. Esengeli kozala engebene na "Yango elobi Nkolo", soki te tokambami na lokuta. Amen.

Mpo na kobanda, bokomona ete na mayangani na ngai, ntango nasilisaka koteya liyangani ya kopalanganisa Nsango Malamu, to liteya moko ya malakisi, nabwakaka monyama mpe naséngaka bato báyanola. Naséngaka bango ete báya liboso mpo na kozwa Molimo Mosantu. Banninga na ngai ba-Pantekotiste, ntango bayoki ngai koloba boye bakanisaka ete nazali kobenga bato báya liboso kozwa libatizi ya Molimo Mosantu mpo ete basilá kobotama mbala ya mibale. Boye ntango nabengaka baoyo batondi na Molimo ete báya mpo na kosalisa bato oyo bayanoli na libyangi ya kozwa Molimo santu, balingami wana bakendeke mbangu epai ya bato oyo babimi liboso mpo na kosunga bango na lolenge oyo ekolendisaka bango bámitika epai ya Nzambe mpe bándima koloba minoko mosusu. Yango ebimisi mobulungano monene, mpe nalingi koyebisa bino mpenza nini nalingi koloba. Nalingi koloba mpo na mosumuki koya liboso mpe kobotama lisusu, elingi koloba kozwa libatizi kati na nzoto ya Klisto na nzela ya Molimo Mosantu, oyo ezali mpenza likambo esalemaki na Pantekote, ntango Lingomba ebandaki. Na elobeli mosusu, kobotama na Molimo ezali kobatisama solo na Molimo Mosantu. Ezali eloko bobele moko.

Sikawa nayebi ete ekozala mobulungano mpo na mwa ntango awa, lokola bato mingi bayebi ete naponamaki lokola moteyi na Lingomba ya ba-Baptiste mpe nalobaka na mpiko nyonso ete ba-Baptiste bazali na libunga ntango kolobaka ete ozwi Molimo Mosantu NTANGO ondimi, mpo ezali bongo te. Toyambaka Ye "NSIMA ya kondima".

Misala 19: 2-6.

*"Alobaki na bango ete : Bozwaki Molimo Mosantu nsima na bino kondima? Bango bazongiselaki Ye ete : "Totikala nanu koyoka te ete Molimo Mosantu azalaka.*

*Polo atunaki bango ete; Bongo bozwaki libatizi ya ndenge nini? Mpe bango balobaki : na libatizi ya Yoane.*

*Bongo Polo alobaki ete: "Yoane abatisaki solo na libatizi ya kobongola motema, kolobáká na bato ete bándimela Ye oyo akoya nsima na ye, elingi koloba Kristo Yesu.*

Ntango bayokaki likambo yango, babatisamaki na Nkombo na Nkolo Yesu.

*Mpe ntango Polo atyaki maboko na ye likoló na bango, Molimo Mosantu akitaki likoló na bango, mpe balobaki na minoko ya sika mpe basakolaki."*

Yango wana. Polo atunaki : "Bozuaki NSIMA ya kondima, kasi TE NTANGO bondimaki ." Mpe ezali na bokeseni monene wana, mpamba te ezali NSIMA na biso kondima nde tozwaka. Baefese 1:13 ezongeli na bosikisiki makambo oyo masalemaki na Efese engebene Misala 19,

*"Bino mpe botyaki elikya na bino kati na Ye, NSIMA na bino koyoka Liloba ya bosolo, Nsango Malamu ya lobiko na bino; na Ye mpe NSIMA na bino kondima (ezali te ntango bondimaki), botiamaki elembo na Molimo Mosantu oyo elakamaki."*

Sikawa, botála likambo oyo nalingi koloba. Bato mingi ya mikolo na biso, ata mpe baoyo balandaka mateya ya moboko (bamibengaka bongo), bandimaka ete lobiko eyaka na ntango moko ya sikisiki, oyo mbala mingi ebéngamaka ete "kozwa ekateli", mpe yango ebéngami ete koyamba Klisto to kobotama mbala ya mibale. Nzokande, koyamba Klisto ezali koyamba Molimo na Ye. Koyamba Molimo na Ye ezali kobotama mbala na mibale. Koyamba Molimo na Ye ezali kobatisama na Molimo Mosantu. Amen. Bato oyo bandimi. Yango ezali malamu mingi. Kasi batélemaka wana. Ozwi Molimo Mosantu NSIMA na yo kondima. Ezalaka ntango nyonso ndenge wana mpe ekozala ntango nyonso bongo. Liloba ya liboso mpenza ya etinda oyo Petelo alobaki na bato na mokolo ya Pantekote ezalaki oyo :

*"Bobongola mitema mpe bobatisama moko na moko na bino, na Nkombo na Yesu Klisto mpo na bolimbisi ya masumu mpe bokozua likabo ya Molimo Mosantu,*

*Mpo ete elaka ezali mpo na bino mpe mpo na bana na bino mpe mpo na baoyo nyonso bazali mosika, kutu bato nyonso oyo Nkolo Nzambe na biso akobenga.*

Malako wana mazalaki eyano ya polele ya Petelo na ntina na likambo oyo esalemaki mpenza na Pantekote. Likambo oyo esalemaki ezalaki ete Nzambe, engebene na Yoele, Azalaki kosopa Molimo Mosantu oyo elakamaki likoló ya bato nyonso. Esopamaki te liboso ya ntango wana, mpe epesamaki te liboso ya ntango wana Ezalaki bongo. Kasi OYO esengelaki koya kobanda sikawa na kobongola motema, kobatisama na Nkombo ya Nkolo Yesu Klisto, bongo na nsima Nzambe azalaki na mokumba ya kotondisa baoyo bayaki. Petelo, to moko ya bantoma alobaki soko moke te ete; "Bosengeli kobotama mbala ya mibale mpe na nsima kotondisama na Molimo."

Mpo na koyeba ete yango ezali lolenge ya makambo oyo moto abiki na oyo etali kozwa Molimo Mosantu, tótala malamu mbala ya nsima oyo Molimo ekitaki likoló na bato.

Misala 8: 5-17,

*"Bongo, Filipino akendeki na engumba ya Samalia, mpe asakolaki Klisto epai na bango.*

*Mpe ebele na bato bazalaki kolanda na bokebi makambo oyo Filipino alobaki, wana bayokaki mpe bamonaki makamwisi oyo asalaki.*

*Mpamba te milimu ya mbindo mizalaki kobima na kogangáká makasi kati na bato mingi oyo bazalaki na yango; mpe bibosono mingi, mpe batengumi babikisamaki.*

*Mpe esengo monene ezalaki na engumba yango.*

*Nzokande, uta kala kati na engumba yango, ezalaki na moto moko na nkombo ya Simona, oyo azalaki kokamwisa bato ya Samalia na misala na ye ya kinganga-nkisi mpe azalaki komimona moto monene.*

*Bato nyonso, bato minene mpe bato mike, bazalaki koyokela ye, mpe bazalaki koloba : "Moto oyo azali nguya monene ya Nzambe."*

*Bayokaki ye na likebi mpenza, mpamba te banda kala akamwisaki bango na bikelakela na ye.*

*Kasi ntango bandimaki Nsango Malamu oyo Filipino ateyaki na ntina na Bokonzi ya Nzambe, mpe ntina na Nkombo ya Yesu Kristo, mibali mpe basi babatisamaki.*

*Bongo Simona ye moko mpe andimaki mpe abatisamaki, mpe akobaki elongo na Filipino. Akamwaki mingi na komonáká makamwisi mpe bilembo minene oyo Filipino azalaki kosala.*

*Nzokande, ntango bantoma oyo bazalaki na Yelusaleme bayokaki ete Basamalia bandimaki Liloba na Nzambe, batindelaki bango Petelo mpe Yoane.*

*Ntango bakómákí kuna, babondelaki mpo na bango mpo ete bakoka kozwa Molimo Mosantu.*

*(Mpamba te, Molimo Mosantu akitelaki ata moto moko te kati na bango, bazwaki kaka libatisi na Nkombo na Nkolo Yesu.)*

*Bongo batiaki maboko likolo na bango, mpe bazwaki Molimo Mosantu."*

Engebene verse 12, BANDIMAKI LILOBA. Na nsima bazwaki libatisi na Nkombo na Nkolo Yesu. Kasi engebene na verse 16, atako nyonso wana, bazwaki NAINO MOLIMO MOSANTU TE. Ezalaki kaka NSIMA ya kondima mpe kobatisama malamau nde bazwaki Molimo Mosantu. Yango ezali mpenza ndakisa oyo Petelo apesi na Misala 2:38-39.

Eteni mosusu ya Makomi oyo ezali kopesa pole ya kokamwa likoló na likambo yango ezwami na Bagalatia 3:13-14,

*"Alakelama mabe moto nyonso oyo abakami na nzete;*

*Ete lipamboli ya Abalayama ékoka koya epai na bapakano na nzela ya Yesu Klisto, mpo (na motindo ete) biso tokoka kozua elaka ya Molimo na nzela ya kondima."*

Sikawa ata moke te ekoki kolobama ete "lipamboli ya Abalayama" ezali mbotama ya mibale, mpe ete "elaka ya Molimo" ezali Libatisi ya Molimo Mosantu, lokola makambo mibale oyo ekeseni. Mpamba te Makomi elobi boye: "Yesu akufaki na ekulusu, mpe na nzela ya liwa mpe lisekwa wana, lipamboli ya Abalayama eyaki likoló na bapakano, longwa na Bayuda. Yango esalemaki mpo ete bato ya mabotá bázwa nzela ya kozwa Molimo. "

Kososola oyo nauti koloba ezali komona mpo na nini bayekoli ya Biblia batikala komona ata moke te Polo koloba na ntango moko boye ete: "Bobotama mbala ya mibale, mpe NA NSIMA botondisama na Molimo." Bango bakanisi ete ezali wana, mpe na bandimbola na bango moko, bazali kotinda Biblia ete éloba bongo, KASI BIBLIA ELOBI BONGO TE Yesu mpe atikala koloba yango ata mokolo moko te.

Botála Yoane 7: 37-39, mpe botanga yango sikawa na bososoli.

*"Na mokolo ya suka, mokolo monene ya elambo, Yesu atelemaki mpe alobaki na mongongo makasi ete:" Soki moto moko azali na mposa ya mayi, áyá epai na Ngai mpe ámela.*

*Ye oyo andimeli Ngai, bibale ya mayi na bomoi ekobima uta na ye, ndenge Makomi elobi.*

*(Kasi Ye alobaki bongo na ntina na MOLIMO, Oyo baoyo bandimeli Ye basengeli kozwa; mpo ete Molimo Mosantu apesamaki naino te; mpamba te Yesu apesamaki naino nkembo te.)"*

Na esika oyo, Biblia elobi polele mpe na makasi ete mondimi, ntango ameli mayi na koyáká epai na Yesu na kondima, bibale ya mayi ya bomoi ekosopana wuta na kati na ye. Mpe emonisi ete likambo yango esalemaki na Pantekote.

Sikawa, ná likanisi oyo na makanisi na biso, tokotanga Yoane 4: 10 mpe 14,

*"Soki oyebaki likabo ya Nzambe, mpe Nani yango azali koloba na yo, Pesá Ngai mayi ya komela; mbele olingaki kosenga na Ye, mpe Alingaki kopesa yo mayi ya bomoi.*

*Kasi moto soko nani oyo akomela mayi oyo Nakopesa ye, akoyoka lisusu mposa ya mayi te; kasi mayi oyo Ngai nakopesa ye ekozala kati na ye libulu ya mayi oyo ekobima kino na bomoi ya seko."*

Ezali bobele mayi yango ya bomoi nde balobeli, kasi na mbala oyo babengi yango ebale te, kasi babengi yango liziba ya mayi. Ezali na esika wana nde bato basalaka libunga na bango. Lokola babengaka yango libulu ya mayi mpe ebale, bango bakanisaka ete na esika moko ezali Bomoi ya Seko oyo epesami na Molimo, mpe na esika mosusu oyo ebengami ebale ( elingi koloba oyo ezali komonisa ete ezali na nguya mingi), esengeli kozala Molimo oyo epesami sikawa lokola elembo ya nguya. Ezali bongo te. Ezali bobele eloko moko. Ezali Molimo oyo epesaka bomoi mpe nguya, mpe yango eyaki na Pantekote.

Eloko nini ebimisaki kozanga bososoli wana? Eyano ezali: "Makambo moto abiki". Tolandaki makambo oyo tokutanaki na yango, kasi Liloba te. Kozwa te makambo obiki lokola emekeli na yo. Nivo ezali bobele moko, emekeli bobele moko, mpe yango ezali LILOBA. Sikawa bótyá likebi mpo na kosósola likambo oyo Petelo alobaki: "Bobongola mitema mpe bobatisama na Nkombo na Yesu Klisto mpo na bolimbisi ya masumu mpe bino bokozwa likabo ya Molimo Mosantu." Polo alobaki: "Bozwaki Molimo Mosantu UTA bondima?" Mokakatano na biso nyonso ezali nde awa. Bato babongolaka mitema na masumu na bango, bazwaka libatisi na mayi, KASI BAKOBAKA TE MPO NA KOZWA MOLIMO MOSANTU. BONDIMAKA PONA KOZUA MOLIMO.

Kondimela Yesu ezali litambe na nzela ya malamau oyo ezali komema na Molimo Mosantu. Kasi bato

bazalaki kosuka wana. Bakendaka kino na mayi, mpe na nsima batikaka. Bandimaka, mpe na nsima batikaka. Biblia elobi te ete ozwi NTANGO ondimi. Ezali: "Bozuaki Molimo Mosantu NSIMA na bino kondima?" Libongoli ya sikisiki mpe ya solo ezali: "Bino bondimaki liboso, bozwi Molimo Mosantu?" Bato bandimaka mpe na nsima batikaka. Okozwa Molimo Mosantu te ntango ondimi MPONA Ye, nsima ya kobongola motema. Osengeli kokoba mpe kozwa Molimo Mosantu. Bomoni yango? Yango nde mabe ya bato ya mobóko na biso. Bazali na nguya te, mpamba te batelemaka liboso ya Pantekote.

Bazali lokola bana ya Yisalaele oyo babimaki na Ezipito kasi batelemaki moke mpenza mpo na kokóta na Mokili ya Elaka. Sikawa, ntango Bana wana ya Yisalaele babimaki na Ezipito, bazalaki makasi na bato soki milio mibale. Bango nyonso basalaki mobembo elongo, bango nyonso bamonaki makamwisi ya Nzambe ndenge moko, bango nyonso balyaki mana mpe bamelaki mayi oyo ebimaki na libanga oyo ebetamaki, bango nyonso balandaki lipata moko na moi mpe likonzí ya móto na butu; kasi BOBELE MIBALE nde bakomaki na Mokili ya Elaka. KAKA MIBALE NDE BAZALAKI MPENZA BANDIMI YA SOLOSOLO. Yango ezali solo mpo Liloba eyebisi biso ete basusu bakufaki mpo na kozanga kondima; mpe na ntina ya bozangi kondima bakokaki kokota te (Baebale 3:19). Boye lokola ezali bongo, mpe bobele MIBALE NDE BAKOTAKI, wana baoyo batikali bazalaki bandimi ya solo te. Eloko nini esalaki bokeseni yango? Mibale batikalaki na Liloba. Ntango mitema ya banóngi zomi elembaki na Kadesi-Barnea, Yosua mpe Kalebe batengatengaki te mpamba te bandimaki Liloba; bongo balobaki: "Tozali na makoki koleka mpo na kobótola mboka yango." Bayebaki ete bakokaki kosala yango mpamba te Nzambe alobaki: "Napesi bino mokili yango." Atako Bayisalaele wana bamonaki nguya, bolamu mpe lobiko ya Nzambe, bakotaki na bopemi te, oyo ezali elilingi ya Molimo Mosantu. Boye bokoki komona ete bobele bato moke nde bakondima kino na kozwa Molimo na Nzambe.

Malamu, tokómi na esika oyo tozali sikoyo. Nakolinga sikawa kokende mosika, mpe nayebi ete ntango nakosala yango, nakolamusa mayoki mosusu. Kasi ezali likambo oyo na ngai nazali na mokumba na yango te. Nazali na mokumba epai na Nzambe, epai na Liloba na Ye mpe epai na bato oyo Nzambe atindi ngai Nasengeli kozala sembo na makambo nyonso oyo Ye ayebisaka ngai náloba.

Na Yoane 6: 37 mpe 47 elobami :

*"Nyonso oyo Tata apesi Ngai bakoya epai na ngai; mpe ye oyo akoya epai na Ngai nakobwaka ye libanda ata moke te.*

*Moto moko te akoki koya epai na Ngai soki Tata abendi ye te: mpe Nakosekwisa ye na mokolo ya nsuka."*

Yoane 1:12 -13,

*"Kasi bato nyonso oyo bayambaki Ye, baoyo bandimaki Nkombo na Ye, Apesaki bango makoki ya kokoma bana na Nzambe.*

*Baoyo babotamaki na makila te, to na mokano ya mosuni te, to na mokano ya moto te, KASI YA NZAMBE."*

Baefese 1: 4-5,

*"Ndenge Aponaki biso kati na Ye liboso na kozalisama na mokili, ete tózala bato ya bule mpe na pamela te liboso na Ye kati na bolingo:*

*Abongisaki biso liboso na bolingo na Ye ete tózwa lokumu ya bana, na nzela ya Yesu Klisto, engebene bosepeli malamumu ya bolingi na Ye."*

Sikawa kozanga komikotisa mingi na likambo ya bokonzi ya Nzambe (mpo ete yango ekozwa buku na yango moko) tika namonisa awa ete engebene na baverse oyo, Yesu Klisto azali kopona mwasi na Ye moko ya libala kaka lolenge mibali baponaka basi na bango ya libala lelo . Lelo oyo, mwasi ya libala aponaka te mobali oyo akobala. Te, mbuta muntu. Mobali nde aponaka mwasi oyo akobala. (Yoane 15: 16: "Bino boponi Ngai te; kasi Ngai nde naponi bino.")

Sikawa, engebene na Liloba na Nzambe, mwasi na libala aponamaki liboso na kozalisama ya mokili. Kopona oyo ya mwasi ya libala ezalaki na mokano kati na Ye moko. Baefese 1: 9.

Mpe na Baloma 9: 11, elobami boye :

*"Mpo ete mokano ya Nzambe na ntina na koponama eumela."*

Okoki kotanga yango na lolenge mosusu te. Mokano ya motema, mokano ya seko ya Nzambe ezalaki ya kozwa mwasi ya libala oyo YE MOKO aponi, mpe mokano yango ezalaki kati na Ye moko; mpe lokola azalaki seko na seko, mokano yango mosilaki kokanama liboso na kozalisama ya mokili.

Botála malamumu sikawa mpo bósosola likambo oyo. Liboso ete ata mwa ndambo moke ya mputulu ya

minzoto ezala; liboso ete Nzambe ázala Nzambe (Nzambe azali eloko ya kosambela, mpe moto ya kosambela Ye azalaki te - boye na ntango wana Azalaki bobele Nzambe oyo akoki kozala), mpe Azalaki kaka lokola Molimo ya Seko, Mwasi na libala azalaki kati na makanisi na Ye. Iyo, azalaki kuna. Azalaki kati na makanisi na Ye Bongo makanisi yango ya Nzambe ezali nini? Yango ezali seko na seko, boye te?

Makanisi ya seko na seko ya Nzambe! Tika natuna bino: "Makanisi ya Nzambe ezali ya seko?" Soki bokoki komona likambo oyo, bokomona makambo ebele. Nzambe abongwanaka te na bomoto na Ye mpe na bizaleli na Ye. Tosilaki koyekola yango mpe kotalisa yango polele. Nzambe azali na suka te na makoki na Ye, na yango lokola Nzambe, Asengeli kozala na boyebi nyonso. Soki Ayebi makambo nyonso, boye Azali sikawa koyekola te, Azali mpe kozwa toli ata na Ye moko te, Azali mpe kobakisa na boyebi na Ye ata moke te. Soki Akoki kobakisa na boyebi na Ye, wana Ayebi makambo nyonso te. Oyo tokoki koloba ezali ete mokolo mosusu Akozala bongo. Kasi yango ezali na Makomi te.

Ye AYEBI makambo nyonso. Atikala kozala naino te na likanisi ya sika na ntina ya eloko moko mpamba te makanisi na Ye nyonso ezalaki mpe ekozala ntango nyonso, mpe Ayebi nsuka uta ebandeli mpo ete azali Nzambe. YANGO WANA MAKANISI YA NZAMBE MAZALI SEKO MAZALI YA SOLO. Makanisi yango ezali te lokola mwango oyo moto asali, oyo mokolo mosusu ekomonana solo mpe ekokokisama, kasi yango ezali ya solo mpe ya seko, ezali eteni ya Nzambe.

Bótala ndenge likambo yango esalaka. Nzambe azalaki ntango nyonso na makanisi na Ye mpo na Adama. Adama, lokola makanisi na Ye, amonisamaki naino te.

Nzembo 139:15-16 ekopesa bino mwa likanisi ya likambo oyo,

*"Nzoto na ngai ebombamaki te na miso na Yo, wana esalamaki ngai na nkuku, ntango natongamaki kati na mozindo ya mabele.*

*"Ntango nazalaki naino na lolenge te, Ozalaki komona ngai; mpe na buku na Yo ekomamaki mikolo nyonso oyo Obongisaki mpo na bomoi na ngai, liboso ete moko na yango ézala."*

Oyo, ndenge nalobaki, ekomamaki na ntina na Adama te, kasi ezali kopesa yo likanisi mpe boyebi ete likanisi yango ezalaki wana kati na makanisi na Ye, mpe likanisi yango ezalaki ya seko mpe esengelaki komonisama. Na yango, ntango Adama akelamaki na mputulu ya mabelé mpe molimo na ye ekelamaki na Nzambe, Adama akómaki likanisi ya Nzambe oyo emonisamaki, na bongo makanisi wana ya seko mamonisamaki sikawa polele.

Tokoki kokóba kati na bikeke. Tomoni Mose, Yilimia, Yoane Mobatizi, mpe moko na moko na bango azalaki likanisi ya seko ya Nzambe oyo emonisamaki polele na eleko na yango. Na nsima, tokómi na Yesu, LOGOS. Azalaki LIKANISI libongi be mpe mobimba, oyo emonisamaki, mpe Ayebanaki lokola Liloba. Yango nde Ye AZALI, mpe AKOZALA bongo libela na libela.

Sikawa elobi ete "Aponaki biso kati na YE [Yesu] liboso na kozalisama ya mokili" Yango elingi koloba ete tozalaki wana ELONGO na Ye kati na makanisi ya Nzambe liboso na kozalisama ya mokili. Yango ezali kopesa ezaleli ya SEKO na mponami. Bokoki kokabwana na yango te.

Tiká nakotisa mwa likanisi moko awa. Ata mbotama na biso ya bomoto etiami likolo na moboko ya koponama. Libumu ya mwasi ebimisaka makei mingi, mingi mpenza. Kasi eloko nini esalaka ete na ngonga moko boye, likei moko boye ebima kasi mosusu te? Na nsima, na kati ya mayi ya mobali, mpo na ntina moko eyebani te, momboto moko boye ekokangama na likei, nzokande bamisusu oyo bakokaki na mpasi te kosala yango, to bazalaki na libaku malamau ya kosala yango kasi basalaki yango te, na bongo bakokufa. Ezali na mayele moko nsima na nyonso wana, soki ezali bongo te, eloko nini esalaka ete mwana ázala mobali to mwasi, ázala nsuki mpembe to moindo, azala na miso ya moindo to ya moindo, soki azali na miso ya mpembe to ya moindo, mpe bongo na bongo. Ná makanisi oyo na boongo, bokanisa na ntina na Yosua mpe Kalebe.

Yesu alobaki te na Yoane 6: 49 ete:

*"Batata na bino balyaki mana na esobe, mpe bakufaki?"*

Na ntembe te, bandeko yango oyo bakufá bazalaki bankóko ya bato oyo Yesu azalaki koloba na bango. Bakufaki, nzokande bazalaki na boponami ya Nzambe na lolenge ya bomoto lokola Yosua mpe Kalebe bazalaki na Molimo.

Kasi mpo na kokende liboso. Baponami wana bazalaki bobele te makanisi ya seko ya Nzambe oyo masengelaki komonisama kati na mosuni na ntango oyo ebongi, kasi baponami yango babéngami na nkombo mosusu.

Baloma 4: 16.



*"Yango wana, elaka eyaka na nzela ya kondima, mpo ete ézala na nzela ya ngolu, mpe mpo ete yango ézala solo epai na bakitani nyonso; kaka te epai na baoyo bazali na mobeko, kasi mpe epai na baoyo bazali na kondima ya Abalayama, oyo azali tata na biso nyonso."*

Baloma 9:7 -13,

*"Atako bazali bakitani ya Abalayama, bango nyonso bazali bana na ye te. Kasi Nzambe alobaki na ye ete: "Na nzela ya Yisaka nde bana na yo bakobengama."*

*Yango elingi koloba ete, bana oyo babotami na ndenge ya nzoto bazali bana ya Nzambe te, kasi ezali bana ya elaka nde batángami lokola momboto.*

*Mpamba te oyo nde liloba ya elaka : Na eleko oyo Nakozonga, mpe Sara akobota mwana mobali.*

*Mpe esuki wana te; kasi ezalaki mpe bongo mpo na Lebeka, oyo azwaki zemi na moto moko, kutu na Yisaka tata na biso;*

*(Nzokande, liboso ete bana yango bábotama mpe básala likambo moko ya malamu to ya mabe, mpo ete mokano na Nzambe na ntina na koponama ekoka kokokisama, kolanda misala ya bato te kasi kolanda mokano na Ye oyo abengaka;*

*Nzambe alobaki na Lebeka ete : "Nkulutu akosalela leki.*

*Kolanda ndenge ekomáma : "Nalingaki Yakobo, kasi Nayinaki Esau."*

Bagalatia 3:16,

*"Nzokande, bilaka bipesamaki epai ya Abalayama mpe mombóto na ye. Alobi te ete : "Mpe na mimbóto, lokola nde na bato mingi; kasi lokola na moto moko, Mpe na mombóto na yo, oyo ezali Klisto."*

Bagalatia 3:29,

*"Mpe soki bozali ya Klisto, boye bozali mombóto ya Abalayama mpe basangoli ya libula engebene na elaka."*

Engebene Baloma 4:16, tozali komona ete Nzambe apesaki Elaka ya Solo epai na bakitani nyonso ya Abalayama, mpe Polo amityaki ye moko mpe bandimi nyonso na nsé ya nkombo wana mpamba te alobi ete: "Abalayama oyo azali tata na biso NYONSO." Na nsima, akobi kaka te mpo na kokitisa ndimbola na ye, kasi mpo na kosukisa yango, mpamba te kati na Bagalatia 3, amonisi MOMBOTO (na bomoko) na Yesu, mpe atángi "bana ya mombóto" lokola bana ya elaka, kolobáká ete elaka etaleli "koponama", to "koponama Ya Nzambe." Mpe ezali yango mpenza nde tozali koloba. Baoyo bazali Momboto ya Bokonzi, bazali baponami ya Nzambe; bango bakanamaki liboso, Nzambe ayebaki bango liboso, mpe bazalaki kati na makanisi ya Nzambe .

Na elobeli ya polele, Mwasi na Libala ya Solo ya Klisto azalaki na makanisi ya Nzambe uta seko, atako amonisamaki te kino moko na moko abimaki na ntango oyo ebongisamaki mpo na ye. Ntango enama mokomoko ebimaki, emonisamaki polele, mpe ezwaki esika na yango kati na nzoto. Na boye mwasi ya libala oyo azali mpenza MOMBOTO MWASI NA LIBALA YA LILOBA ELOBAMI. Mpe atako azali mwasi na nkombo, babengaka ye mpe "nzoto ya Klisto". Emonani polele ete asengeli kobéngama bongo mpamba te aponamaki liboso kati na Ye, autaki na liziba moko, azalaki na bomoi ya seko elongo na Ye, mpe azali sikawa komonisa Nzambe kati na nzoto oyo ezali na binama mingi, nzokande kala Nzambe amonisamaki kati na ENAMA MOKO, elingi koloba Nkolo na biso Yesu Klisto.

Na yango, sikawa tozali kokóma na bosukisi. Lokola Logos ya seko (Nzambe) amonisamaki kati na Mwana, mpe kati na Yesu, litondi nyonso ya Bonzambe efandaki kati na nzoto, mpe Moto wana ya Seko azalaki Tata oyo amonisamaki kati na mosuni, mpe na bongo azwaki nkombo ya Mwana, bobele bongo biso, baoyo tozali seko kati na makanisi na Ye, tokómi na ngala na biso binama mingi ya Mombóto Liloba oyo Elobami, oyo emonisami kati na mosuni, mpe makanisi wana ya seko oyo emonisami sikawa kati na mosuni ezali bana ya Nzambe, kutu tobengami nde bongo. TOKOMAKI TE MOMBOTO NA NZELA YA KOBOTAMA MBALA YA MIBALE, TOZALAKI MOMBOTO YA YANGO TOBOTAMAKI LISUSU MPAMBA TE BOBELE BAPONAMI NDE BAKOKI KOBOTAMA MBALA YA MIBALE. Tokoki kozongisama na bomoi mpo TOZALAKI MOMBOTO. Kati na oyo ezali MOMBOTO TE, eloko ya kozongisama na bomoi ezali te.

Bosimba yango malamau na makanisi. Sikawa, tókende na likambo oyo elandi. Kosikola elimboli kosomba eloko oyo ozalaki na yango na ebandeli. Ezongisaka na nkolo ya ebandeli. Nzambe, na nzela ya liwa na YE, makila oyo esopnaki ESIKOLAKI BAOYO YA YE MOKO. Asikolaki Mwasi na Libala Liloba oyo Elobami. "Bampate na Ngai bakoyokaka mongongo na Ngai (Liloba) mpe balandaka Ngai." Ozalaki ntango nyonso mpate. Ozalaki soko moke te ngulu to mbwa oyo ebongwanaki mpate. Yango ekoki kosalema te

mpamba te lolenge nyonso ya bomoi ebotaka lolenge na yango moko mpe mbongwana ya motindo ezalaka te. Lokola tozalaki kati na makanisi ya Nzambe mpe na nsima tomonisamaki na nzoto ya mosuni, mokolo moko esengelaki koya wana tokoyoka mongongo na Ye (Liloba), mpe wana tokoyoka mongongo yango, tokososola ete Tata na biso azali kobenga biso, mpe tokoyeba ete tozali bana na Nzambe. Toyokaki mongongo na Ye, mpe lokola mwana mobali oyo abungaki nzela togangaki : "Bikisá ngai, Tata na ngai. Nazali kozonga epai na Yo."

Mwana na Nzambe akoki kozwa ntango molai liboso na ye koyeba ete azali mwana. Na ntembe te, Baklisto mingi ya solo bazali lokola lisolo ya mwana ya mpongo oyo abimaki na nsé ya nsoso. Boyebi ete mpongo ezali elilingi ya mondimi ya solosolo. Ee, mosali bilanga moko azwaki líkei na zúmbu ya mpongo mpe atiaki yango na nsé ya soso. Na ntango oyo ebongi, makei nyonso oyo ezalaki na nsé ya nsoso epasukaki. Bana ya nsoso bayokanaki malamumu na mama nsoso, kasi mpongo moke oyo akokaki te komesana na lolenge ya koganga mpe ya koluka bilei kati na bosoto. Azalaki kosala makasi mpo na kobika, kasi azalaki na mobulungano na itina na nyonso wana.

Kasi mokolo moko, uta mosika na mopepe mama mpongo oyo abotaki likey yango, amonaki mpongo moke wana na mabele. Akitaki na lombangu ya kokamwa mpe agangaki na mongongo makasi epai na ye ete apumbwa likolo mpo na kokutana na ye. Ye ayoká naino mpongo koganga te, kasi ntango ayokaki koganga wana ya liboso, eloko moko kati na ye eninganaki mpe azalaki na mposa makasi ya kopumbwa kuna epai na yango. Kasi azalaki kobanga mpo na komeka. Mama mpongo yango Mama agangaki lisusu maksi epai na ye ete ámata na mopepe mpe álanda ye. Ye azongisaki na koganga makasi ete azalaki kobanga. Mbala moko lisusu mama mpongo abelelaki, kogangáká epai na ye ete ámeke. Abetaki mapapu na ye mpe amibwakaki na likoló, mpe na koyanoláká na koganga ya mama na ye, apimbwaki na likolo ya bulé. Bomoni, azalaka ntango nyonso mpongo. Azalaki kosala lokola mwana ya nsoso mpo na mwa ntango moke, kasi akokaki kosepela te. Kasi ntango ayokaki libyangi ya mpongo monene, azongaki na esika na ye. Mpe soki mwana ya solo ya Nzambe ayoki konganga ya Molimo na nzela ya Liloba, ye mpe akoyeba soki azali nani mpe akokima epai ya Mosakoli Mpongo Monene mpe akozala elongo na Ye libela na bisika ya likoló kati na Klisto Yesu.

SIKAWA LIBANGA NA BISO YA MOTÓ YA NKEMBO EYEI likolo na Libatizi ya Molimo Mosantu.

Bagalatia 4:4-7,

*"kasi wana ntango ekokaki, Nzambe atindaki Mwana na Ye, abotamaki na mwasi, abotamaki na nse ya mobeko,*

*mpe na kosikola baoyo bazalaki na nse ya mobeko, mpo ete tókoka kozwa bokonzi ya bana.*

*Mpe lokola bozali bana, Nzambe atindi Molimo ya Mwana na Ye na kati ya mitema na bino, kogangáká: Aba, Tata!.*

*Boye, ozali lisusu moombo te, kasi mwana; mpe soki ozali mwana, ozali mpe mosangoli na libula ya Nzambe na nzela ya Klisto."*

Yango wana. Yesu Klisto ayaki, Akufaki na ekulusu, mpe Akokisaki Lisiko (kozongisa na nkolo na yango ya ebandeli na nzela ya kosomba, to kofuta motuya) mpe na yango ATYAKI BISO LOKOLA BANA. Akómisi biso bana te, mpo tosilaki kozala bana na Ye, kasi Atyaki biso na esika lokola bana na ye; mpamba te ntango nyonso oyo tozalaki kati na mokili, kati na nzoto, tokokaki te koyebana lokola bana na Ye. Zabolo akangaki biso na boombo. Kasi ata bongo, tozalaki bana. Mpe boyoka likambo oyo: MPE LOKOLA BOZALI BANA, NZAMBE ATINDI MOLIMO YA MWANA NA YE NA KATI YA MITEMA NA BINO, NA NZELA NA YANGO BOZALI KOGANGA : TATA, TATA." Likolo na nani Molimo ekitaki na Pantekote? Likolo na bana. Na Kolinti? Likolo na Bana wana bazali KOYOKA LILOBA.

Libatizi ya Molimo Mosantu ezali nini? Ezali Molimo, kobatisáká yo kati na nzoto ya Klisto. Mbotama ya mibale. Ezali Molimo ya Nzambe oyo ezali koya mpe ezali kotondisa bino nsima na bino kobongola mitema, (wana boyoki Liloba na Ye) mpe kobatisama na mayi lokola eyano ya lisosoli malamumu liboso na Nzambe.

Makambo oyo towuti kolakisa ekokaki kozala mpasi te mpo na bato nyonso kososola soki bato nyonso bandimaki malakisi ya bomoko ya Bonzambe. Mpo ete bato bazali misato te kati na Bonzambe wana, kasi MOKO. Na boye tobotami TE mbala ya mibale na nzela ya Molimo ya Bomoi ya Yesu oyo ezali kokota na kati, mpe na nsima na yango Molimo Mosantu azali kokota mpo na kopesa biso nguya. Soki ezali bongo, mpo na nini tozali kotyola Tata na kozangáká kopesa Ye lokumu na lobiko mobimba na biso, mpamba te soki lobiko ewuti na Nkolo, mpe Ba-Nkolo bazali misato, wana YE (Tata) asengeli mpe kozala na eloko ya kosala. Kasi na ntembe te ekoki komonana ete Yesu amonisaki yango polele mpenza ete ezalaki Ye mpe bobele Ye nde Azali Nzambe mpe ezali Ye mpe bobele Ye nde azali koya na kati ya mondimi.

Yoane 14: 16 elobi ete Tata akotinda Mobondisi mosusu.

Kasi molongó ya 17 elobi ete Ye (Yesu) afandi elongo na bango, mpe ete na nsima Akozala NA KATI na bango.

Na molongó ya 18 Alobi ete Akoya epai na bango.

Na molongó ya 23, na kolobáká na bayekoli, Alobaki : "Biso (Tata mpe Mwana) tokoya epai na ye." Na yango ezali Tata, Mwana mpe Molimo Mosantu bango nyonso bazali kokóta mbala moko, mpo EZALI MOTO MOKO nde asali Bonzambe. Boyei wana esalemaki na Pantekote. Boyei ya Molimo ezali mibale te, bobele moko. Mokakatano ezali ete bato bayebi bosolo te, mpe bandimaka Yesu bobele mpo na bolimbisi ya masumu kasi bakóbaka ata moke te kokende liboso mpo na kozwa Molimo.

Yambo ya nasukisa na liteya oyo, nayebi ete motuna moko ezali na makanisi na bino. Bokolinga koyeba soki ngai nandimaka malakisi oyo elobaka ete moto azalaki liboso ya kozala. Nandimaka te liteya ya Bamormons oyo elobaka ete molimo ezalaka na bomoi liboso ya kozala, ndenge moko mpe nandimaka te ete moto abotamaka lisusu na nzoto mosusu, to molimo ekendaka kofanda na esika mosusu. Bókeba mpe bótala likambo oyo. Ezali moto te nde aponami na Nzambe mpo na libela, EZALI LILOBA, TO MOMBOTO. Ezali nde bongo. Na ntango ya kala kuna, mosika mpenza mpo ete makanisi ya moto ekoka kososola, Nzambe ya seko oyo azali na makanisi ya seko, Akanisaki mpe Akanaki ete :

"NALINGAKI YAKOBO, KASI NAYINAKI ESAU,

(Baloma 9: 13)

NTANGO MOKO TE NA BANGO ABOTAMAKI, MPE MOKO TE NA BANGO ASALAKI MALAMU TO MABE.'

Bomoni, ezalaki LIKANISI, mpe na nsima likanisi yango emonisamaki, mpe Nzambe azongisaki Yakobo, mpamba te bobele Yakobo nde azalaki MOMBOTO. Bobele Yakobo, nde azalaki na mombóto; yango wana azalaki na limemya na makoki ya bokulutu mpe na boyokani ya Nzambe. Soki ozali mombóto ya solo, okoyóka Liloba yango; Molimo akobatisa yo kati na nzoto ya Klisto, Akotondisa yo mpe Akopesa yo nguya, mpe okoyamba Liloba ya mokolo mpe ya eleko na yo. Bomoni ndenge nini elembeteli ya solo ekomaka polele ntango Liloba emonisami epai na yo? Bótala lisusu : Yesu azalaki Mombóto ya Bokonzi. Azalaki kobika kati na nzoto ya moto. Ntango Molimo abengaki Ye (Likanisi-Liloba oyo Emonisami), Akendeki na Ebale Yaladene mpe kuna abatisamaki na mayi. Ntango Atosaki Liloba, Molimo Mosantu ekitaki likoló na Ye mpe mongongo moko elobaki ete: "Oyo azali Mwana na Ngai ya bolingo, bóyoka Ye". Mongongo elobaki te ete : "Oyo akómi Mwana na Ngai," Yesu AZALAKI Mwana. Molimo Mosantu apesaki Ye lokumu ya Mwana liboso ya bato nyonso. Na nsima, lokola Atondisamaki na lolenge yango (mpe motindo moko esalemaki na Pantekote mpe nsima na yango), Akendeki na nguya oyo emonisamaki, Azwáki emoniseli mobimba ya Nzambe mpe uta na Nzambe, mpo na mokolo wana.

Sikawa tozalaki koloba ntango nyonso ete elembeteli ya solo ya kobatisama na Molimo Mosantu ezali ete mondimi áyamba Liloba ya eleko oyo azali kobika kati na yango. Botika nálakisa bino polele mpenza.

Bileko Nsambo, ndenge elobelami na Emoniseli mokapo 2 mpe 3, esangisi eleko mobimba ya Botondi ya Bapakano, to ntango mobimba oyo Nzambe azali kosala na bapakano mpo na lobiko. Na moko na moko ya bileko, kolongola ata moko te, likambo moko elobelami na ebandeli mpe na nsuka ya nsango epai na eleko moko na moko "Epai ya momemi-nsango ya (Efese, Sumuluna, Pelegamo, Tyatila, Saladi, Filadelefa, Laodikia) koma : Makambo oyo elobi Ye, mpe bongo na bongo."... Ye oyo azali na litoi, ayóka (na bomoko) oyo Molimo azali koloba na mangomba." Bótala awa ete Yesu (na nzela ya Molimo), na eleko NIONSO azali koloba BOBELE na moto MOKO na oyo etali Liloba mpo na eleko yango. Bobele momemi-nsango MOKO mpo na eleko moko na moko nde azwaka oyo Molimo azali na yango mpo na koloba na eleko wana, mpe MOMEMI-NSANGO MOKO wana azali momemi-nsango na lingomba ya solo. Azali koloba uta na Nzambe, na nzela ya emoniseli, epai ya "mangomba", ya solo mpe ya lokuta. Na nsima, nsango yango epanzani epai ya bato nyonso. Kasi, atako nsango yango ezali kopesama epai ya bato nyonso oyo bakoki koyoka yango, nsango yango eyambamaka na moto moko moko ya etuluku moko ya bato oyo bazali na makoki na lolenge moko boye. Moto na moto kati na etuluku wana azali na likoki ya koyoka oyo Molimo ezali koloba na nzela ya momemi-nsango. Baoyo bazali koyoka bazali kozwa emoniseli na bango moko te, to mpe etuluku moko kozwáká emoniseli na bango ya lisanga, KASI MOTO MOKO NA MOKO AZALI KOYOKA MPE KOZWA OYO MOMEMI-NSANGO ASILI KOZWA UTA NA NZAMBE.

Sikawa, bókamwa te ete ezali bongo, mpamba te Polo, na nse ya loboko ya Nzambe, apesaki ndakisa yango. Bobele Polo nde azalaki na emoniseli mobimba mpo na mikolo na ye, lokola emonisamaki na bokutani na ye elongo na bantoma mosusu, oyo bandimaki ete Polo azalaki Mosakoli-Momemi-nsango epai na Bapakano na eleko wana. Lisusu, tótalela ndakisa moko oyo ezali na kati ya Liloba ya Nzambe, oyo emonisi ete ntango Polo alingaki kokende na Azia, Nzambe apekisaki ye, mpamba te bampate (bana na Ye) bazalaki na Masedonia mpe bango (bato ya Masedonia) balingaki koyoka makambo oyo Molimo ezalaki koloba na nzela ya Polo, nzokande bato ya Azia balingaki kosala yango te.

Na bileko nyonso, tozali mpenza komona na likambo moko wana. Yango wana pole eyaka na nzela ya

momemi-nsango moko oyo atindami na Nzambe na esika moko boye, na nsima, longwa na momemi-nsango yango, pole ekopanzana na nzela ya mosala ya bato mosusu oyo balakisamaki na bosembo nyonso. Kasi, ezali solo ete bato nyonso oyo bakendaka libanda mpo na mosala, bayekola mpenza te boni ezali na motuya koloba BOBELE makambo oyo momemi-nsango asilaki koloba. (Bobosana te, Polo akebisaki bato ete báloba kaka makambo oyo ye alobaki, 1 Bakolinti 14: 37: *"Soki moto moko akanisi ete azali mosakoli to moto ya molimo, áyeba ete makambo oyo nakomeli bino ezali MITINDO YA NKOLO. Nini? Liloba na Nzambe euti nde epai na bino? To eyaki kaka epai na bino? "*) Bazali kobakisa awa, to kolongola kuna, mpe mosika te nsango ezali lisusu peto te, mpe kolamuka ezali kokufa. Boniboni tosengeli kozala na bokebi mpo na koyoka mongongo MOKO, mpo ete Molimo azali kaka na mongongo moko oyo ezali mongongo ya Nzambe. Polo akebisaki bango ete báloba oyo ye alobaki, kutu Petelo mpe asalaki bongo. Akebisaki bango, kolobáká ete ATA YE (POLO) akokaki te kobongola liloba moko ya oyo apesaki na nzela ya emoniseli. Oh, ezali na motuya mingi koleka koyoka mongongo ya Nzambe na nzela ya batindami na Ye, mpe na nsima koloba oyo epesamelaki bango mpo na koloba na mangomba.

Nabanzi ete bobandi komona yango sikawa. Ntango mosusu bokoki sikawa kososola mpo na nini nandimaka te makanisi ya bato ya mateya ya mobóko mpe ya ba-Pantekotiste. Nasengeli kotikala na Liloba na lolenge oyo Nkolo amonisi yango. Sikawa, nalobi makambo nyonso te. Yango ekosenga mokanda mokeseni, kasi na lialisi ya Nkolo, tokozwa mateya mingi mpe bakaseti mpe bansango na ntina na makambo oyo nyonso mpo na kosunga bino bósosola mpe býokanisa Makomi nyonso.

*"Ye oyo azali na litoi, áyoka oyo Molimo alobi na mangomba ya eleko moko na moko."* Na bileko nyonso, koganga ezalaki kaka ndenge moko. Býoka oyo Molimo azali koloba. Soki ozali Moklisto, okozóngá na oyo Molimo azali koteya, yango ezali Liloba mpo na eleko oyo. Momemi-nsango moko moko ya eleko moko moko akoteya Liloba yango. Kolamuka nyonso ya sika mpe ya solo ekosalema mpo ete bato bazongeli Liloba mpo na eleko na bango.. Kolela ya bileko nyonso ezali mpamela : *"Botiki Liloba na Nzambe. Bóbongola mitema, mpe bózonga na Liloba. "* Kobanda na mokanda ya liboso ya Biblia (Genese) kino na oyo ya nsuka (Emoniseli), kozanga bosepeli ya Nzambe ezali kouta na likambo bobele moko: kotika Liloba; mpe ezali kaka na nkisi moko mpo na kozongisa boboto na Ye: kozóngá na Liloba.

Na eleko ya Baefese, na eleko oyo, mpe na eleko nyonso oyo tozali koyekola, tokomona ete ezali solo. Mpe na eleko ya nsuka, oyo ezali eleko na biso, tokomona ete Liloba ezali lisusu te, mpe bobwaki mobimba oyo ya Liloba ekosuka na minyoko monene.

Soki ozali mombóto ya solo, soki obatisami solo na Molimo Mosantu okopesa motuya na Liloba na Ye likolo ya biloko oyo osengeli na yango, mpe okozala na mposa makasi ya kobika Liloba NIONSO oyo ebimaka na monoko ya Nzambe.

Oyo nde libondeli na ngai ya mozindo mpo na biso nyonso; tiká ete tóyoka oyo Molimo ezali koloba na biso lelo na Liloba.



[www.messagehub.info](http://www.messagehub.info)

Mateya eteyami na  
**William Marrion Branham**  
*"... Na mikolo ya mongongo..."* Emoniseli 10:7